

疎翁遺稿

乾

賦詩疏議

5563.8  
5021  
v.2

策

BERKELEY  
LIBRARY  
UNIVERSITY OF  
CALIFORNIA











Carpentier



疎翁遺稿序

疎翁成公箕裘詩禮砥礪名行推其餘以及文章爲一時所推  
重值公健陵盛際亦旣輩英歷試外內宜其黼黻皇猷翱翔巖  
廊贊襄一代之治而乃爲世所忌擯斥竄逐不能一日安於朝  
識者至今慨然日者公之曾孫載朝君與其從侄近鎬甫抱公  
遺稿訪余蓉湖之寓歔歔而言曰吾曾祖詩文之宜梓而未梓  
爲屢世未卒之志今其責惟吾二人在而齒髮已衰恐一朝溘  
然未克有成使先世遺徽泯而不傳無以藉手歸見於地下乃  
竭力經紀將付剞劂顧此矇昧豕亥莫辨請君爲之校讎仍惠  
以數行弁卷之文余辭不敢愈辭而請益勤以余膚淺拙劣何



足以副其求然念二君年俱七旬餘間關十舍之程力疾以來  
其誠意懇摯有足動人是不可以終辭謹受而讀之略整其訛  
誤概其詩文平淡紆餘不規規於字句聲韻之末而自成一家  
噫以公之才之學未罄展布於當時乃以數卷殘墨圖不朽於  
後誠可歎惜然後之有慕於公者於此而求之則零金片羽亦  
足以窺其一斑二君之欲以是壽公亦烏可已也余於是竊又  
有感焉世之知公者莫不以擯斥竄逐爲可悲而由今視昔雖  
欲如公之擯斥竄逐而不可得嗚呼真可悲也夫

乙亥四月三日完山李範世謹識



疎翁遺稿總目

卷之一

辭

賦

詩

卷之二

詩

疏

議

卷之三



卷之三

書

序

記

跋

教書

箋文

銘

墓誌

墓誌銘



墓碣銘

墓表

卷之四

行狀

行錄

傳

祭文

祝文

上樑文



卷之四	卷之三	卷之二	卷之一	卷之四	卷之三	卷之二	卷之一
-----	-----	-----	-----	-----	-----	-----	-----



疎翁遺稿卷之一

辭

昌寧成德雨著

反歸去來辭

陶辭以田園爲歸而余則以眞宅爲歸意實相反故名

曰反歸去來辭云爾

歸去來兮眞宅匪遠何忘歸官堵三而已休壽望八而奚悲固  
蒲柳之先零詎喬松之能追韓送窮而益窮遽知非而愈非如  
牛體之毛落等倉梯之身微尙題旌有清啣可束屍以布衣乃  
瞻蒿里我行如奔先歸有子應候墓門莫云泉臺親懿俱存但  
恨在世酒未罄樽親友有其不昧可相對而歡顏雖未聞乎大



道得生順而死安苟夜朝之悟理庶夢覺之透關倘無心於但  
化是可謂之達觀同浮雲之暫出類倦鳥之方還無尙父之六  
韜詎八十而桓桓歸去來兮與造化而優遊旣與時而相背七  
十翁兮何求遊寥廓而鬼隣信無喜而無憂窺其室而問若步  
何及於田疇送崖皆返我車我舟佇藉靈於沒地幸遂願於首  
丘物當春而復榮泉遇雨而更流惟原始而返終一理昭於浮  
休已矣夫此生歸何時塵世混濁可連留胡矣乎汲汲兮將何  
之富貴非可待泉塗是爲期青氈遺於子孫黃卷勉於耕耔留  
數畝之荒園有千篇之歌詩賡陶詞而擬輓莫非命也更底疑



泛舟金甲島賦

金甲島在珍島郡南三十里由郡治踰山度谷過數小  
村行二十餘里路窮而海有小聚落依海岸可四十餘  
戶朝家設海防於此置水軍萬戶廷臣有罪者必投配  
隸於萬戶月朔必點閱而報營前有一島潮退可徒涉  
以通卽金甲島也周可四十里用徑圍法東而西南而  
北皆十餘里島民八九家無田可農皆採海爲生島舊  
養松伐舡材歲甲寅秋海溢以風々折波漂盡枯死但  
有灌莽雜樹島四面潮汐蕩鬻多奇石削壁舟環可玩  
余謫居此島之年四月小望夜使萬戶具小舟携一子



一客登焉沿洄數里而歸

維海有島極炎之徼北距京師千有餘里南望瀛洲一帆匪遙  
山椒水涯之間纍纍如蟹筐燕巢者戶不過爲數十摠如蟹而  
如獠瘴起則漫天蔽地颶作則噴波浸山無橘榴茱菊以佐酒  
無梅柳桃杏以娛顏或堰浦而種稻或耕山而播麥每水溢而  
風披率三歲而一熟採藿蛤而爲生亦厘厘而時有寔炎方之  
遠惡爲遷人之淵藪歲赤龍之律窮余得罪而遐屏脫三木之  
危喘飄一葉之孤影昇病軀而追程何雪虐而風颳饕賴聖德  
之好生得不死於道途僦一室而將息越三月而稍蘇于時節  
屆清和時物繁昌楓篁交陰芷蒲播香旣余病之新起思宣鬱



而暢志乃命舟於浦口携一客與一子駕一葦之搖々凌萬頃之茫々於是月出潮上風恬浪平沙嘴拖白島面轉青村燈歷歷人語可聽把酒顧眄其樂洋洋旣而歌赤壁之賦誦岳樓之文哀蘇仙之望美感范子之憂君情方蹙而鮮歡興旣極而生悲停金觴而不御輟桂棹而將歸客曰三星在東時夜未半方將擊空明泛汗漫恣心目之寥朗窮水月之賞玩何夫子之興淺羌中途而欲返余曰危不可乘樂不可極况涉深則有蛟龍鯨鼉之患觸夜則有風露瘴氛之毒君子不立於巖墻聖人垂戒於流連客其不讀夫孟氏之篇乎客乃呀然而笑奮然而前曰夫子之言則是矣然而某也窃習於夫子之平生矣夫子讀



書而不汲汲於場屋通籍而不役役於宦途杜門終日文史自  
娛持身若處子避勢若憊夫門絕貴者之轍時歸山人之號宜  
其避遠賊機超脫禍罟而乃風波忽起於平地雷霆遽震於晴  
空命懸刀鉅之間魂飛湯火之中見者爲之魄褫聞者爲之心  
寒非 聖主之至仁詎重誅之得寬然則惡在其謹身守靜之  
效哉余聞之仰而歎俯而涕良久而言曰余起跡儒素歷職華  
顯雖以病而屢<sub>連</sub>實辜恩而干典況天官之爲職世皆謂之華  
選以一生之冥適入衆目之睢盱宜過福而生災矧以聖而責  
愚如飛蛾之撲燈若赤子之投井孽旣出於自作罪敢諉於微  
眚然而 聖上不加誅臺臣不加討免就戮於蒿街得保喘於



海島茲非其幸歟方當益謹其所未謹益守其所未守倘蒙  
恩而北還庶深閉於葦葑苟斯言之或渝有如彼之白水客聞  
而拜相與數酌而醉不知更鼓之已三四矣

詩

咏魚頭

七歲作

口吹青魚頭能作鷄鳴聲疑是孟嘗客函谷半夜鳴

花石亭

九歲作

花石亭臨大江頭先生遺躅至今留今來不盡江山興花發明  
年更來遊

伊山旅舍奉別三從兄士進氏



吾宗零落盡況復各天涯峽寓方秦贅湖居亦越歌我無南渡策兄失北歸家親戚源々樂終無可奈何

李友聖庸

昌叔

新買匏泉三淵舊榭安友彥珍

廷鉉

已次

其韻余則因循未果矣長夏索居不禁停雲之思庸友又遠書索之因付二詩下疊叙壯洞之好卜隣之意

淵老何年手挿籬卜居於此性攸宜窓臨絕澗雲生處簾捲終南雨細時繞屋松陰排遣暑入庭槐月送來詩主人剩得冥棲趣又道龍庄占水湄

甲申九月東遊海山略叙所經賦一百二十韻

天地運元化清淑偏青邱蓬萊最瓌奇磅礴亘東州瀛船望不



到茫然使心愁殊域願它生吾教欲焚修而我生東國若無閒  
暫偷丹鼎鍊幾時奈此同蜉蝣擇日理行裝一瓢懸筇頭時當  
九月初嚴霜落梧楸飄然出門去逸興橫清秋經行豈無覩瑣  
細不及搜東行但信日奄至嶺之陬先登海山亭凭檻送遠眸  
楓岑出其背巨澤前悠悠天水不見際蒼然但雲浮洪波日夜  
吼九郡如乘舟白雲生空碧明月吐琉璃離立七星峰點々如  
浮漚磊々海金剛萬形工鏤鏤雄削劒特拔短尖笋方柔若是  
青州石厥貢同琳瑯暫停謝公屐且浮孔聖桴雲颿飽西風簫  
笛哀中流回頭望關嶺天末橫眉脩吾亦厭世者直欲窮三洲  
波湧舟不進悵望空夷猶却尋四仙跡欲踵三日濤中開一泓



淨外環群峰稠湖心聳彩構突兀與神謀  
巖髻雲端見魚隊鏡中流埋香笑空願汚石多  
凡儔丹書述郎字萬古留勁道楊公四句詩  
千載掃咄咄海客去已久斜陽下鷺鷥山頭  
兩石扇穹然蔭可庥於焉復望海曠然散餘  
憂青鳥何時來欲去還躊躇於此或於彼且  
復入山求遐方俗還淳欸接隨所投粳飯勸  
飽清耐澆客喉魚蟹不用錢禾黍亦滿篝此  
間信樂土吾欲寄鋤耰蕪菽投新溪窈窕境  
已幽蕭灑普雲庵竹屋誰綢繆袈裟啓經函  
繚徒爭衣振肅整尊師道儒服還堪羞崎嶇  
訪玉洞因得窮龍湫冒林方前礙鉤石或後  
樓攀壁附鐵索飄空若風轍耽玩急險危旣  
度還悔尤忽立萬丈壁中掛一疋紬得非垂  
長



虹無乃下玉虬嵌竇閉神物雲雨常逗遛惴慄不敢近恇惴遺  
溺洩出谷聲猶隨風雨耳颺々鉢淵名何得石陷狀如甌僧徒  
戲馳瀑崖滑不自由集仙暨彩雲劒立摩斗牛踰嶺到圓通楓  
檜漸相樛岩嶢躋佛頂十步恒九休松林十二瀑恨值雲不収  
壯哉榆帖寺剏立自帝劉枯查五十佛纍々懸獮猴荒誕石鍾  
事怪語誰輯裒行々上水峴內外分鴻溝筍輿候已先傳遞速  
置郵多土俄痴重戴石方拔抽沓嶂擁摩訶森列尤無籌斜日  
照香城皚若粉堞周欲上白雲臺垂堂戒懷々徑至萬瀑洞忽  
若衆口咻驟聞闐呶々細聽泣啾々對面不聞語但見動輒頰  
行尋八潭名形稱頗相侔彷彿舟橫灘穹窿龜負疇懸崖訝散



珠急掇虛撈，泐琵琶狀，尤酷却欲度空篋。巖巒競效奇，願眇不  
可酬蓬萊八字石。上盤銀鉤危哉普德窟，梯空架窓牕暫喫。  
表訓飯急登正陽樓，一萬二千峰戢々來相摯。蒸霞曉滿壑，蔚  
藍藏好醜。晴明出稜角毫毛焉，得度毘盧儼處尊。衆山羅導騶  
無乃帝東巡，方岳朝群候。峨々奉圭璋，肅々拜冕旒。還疑將登  
壇，萬幕屯貔貅。森々列鈚戟，尊々擁兜鍪。或如周序陳弘璧，兼  
天球或如牧野誓。稱戈戛比矛，或如綺皓輩。飄翩下雲輶，或如  
金佛像。趺坐儼胡僧，或怪如蹲獸。或決如奔驪，或儼若冠峩。或  
岐若觺觺，或顧若相呼。或背若相仇，或差若長幼。或齊若匹述，  
或散若擺陳。或聚若圍蒐，敷々花破萼。簇々矢拔葢，綿々斷復



連蹲々去還留或者造化巧斲雕煩斧鉢或者海濤嚼肉盡餘  
鬻體有樹皆爲楓有草皆非蕓嵯峨插白玉爛熳被錦綢對此  
爽心目悅如宿疴瘳鸞驂待不來空宇風颺々歸逕入靈源玉  
潭流漉々圍嶂欲搏人峻壁時墮鶯俛入地獄門鎖閉真如囚  
弓王有遺墟遊鹿但呦々哀哉樂遊盤顛木無孽舄菴寮占深  
僻洞天頗寬優群巒更奇秀周匝如幃幃暫憇地藏菴咿軋聽  
咀謳暮尋長安宿歸橐傾殘餽朝出萬松林回首久悵惆三句  
極遊遨一筇恣踐蹂向來甘井蛙齷齪同鸞鳩今焉償宿願若  
決心中疣歸思壯遊詩浩々追韓歐始知子長文不在焚膏油

拈明律韻問沈友

敬希病



驚雪狂風雜雨絲蕭條已作暮年悲  
波寒澤國空魚渚葉盡林  
皐見鵲枝身賤不來城裏字  
土思多得枕邊詩西隣一病經旬  
臥剝啄東家更是誰

豐前韻記婦言

病婦燈前理亂絲  
申々交謫怒兼悲  
莫誇胸裏藏書籍  
不見髭  
邊挿桂枝試紙每供機上帛  
歸裝惟滿篋中詩  
備嘗艱苦無如  
我不怨蒼天  
更怨誰

除夜客洛次東坡詩

藩府競餽歲高門  
走書佐土產  
固有宜君子  
焉用貨  
但用充谿  
壑不計邑小  
大開緘海味  
列發籠青蚨  
臥一物少失意  
不敢登



其座古法重犯臟鼎烹酷春磨窮巷弊席門寂々人誰過濁醪  
不得飲孤琴自唱和

右次餽歲韻

行人適遠方臨岐尙暫遲奈何白日光忽々不可追冉々方東  
上回顧己西涯今日別亥歲借問來幾時踈鬢換舊綠愁顏減  
昔肥床書負初心撫劍中夜悲饑火且驅迫關柝不能辭桑榆  
亦非晚志氣貴不衰

右次別歲韻

窮陰閉天地大澤深龍蛇胡爲着塵帽見人扇自遮妻子在山  
中守歲心如何孤坐念遠客兒曹但相譁念此不能眠臥聽晨



鍾攄曉氣侵膚冷殘燈半壁斜誰送一樽酒慰此成蹉跎寄語  
遠遊人浮榮安足誇

右次守歲韻

登塹城壇歸路口占示鄭季心

一筇來俯萬尋清今日茲遊冠此行孤舶定知天外去片雲時  
復望中生遙山出沒忠全界恕浪掀翻統禦城塵緣未盡旋歸  
臥依舊深齋久客情

咏貧

吾家上下率並馬十口食直長七品祿半土不盈斛朝夕戴米  
出易錢纔五六江柴束似指蝦蟇貴如玉對案無下箸妻子持



塩白如是過數日依舊竈煙息

尙方直廬

官居尙瑞五雲邊  
鳴玉遙聞集衆仙  
白首潛郎身獨賤  
尺天猶隔路三千

送李稚喬

普瞻

出宰雪城

螢雪辛勤滿案書  
暮年成就一銅魚  
牛刀小試休嫌薄  
武邑絃歌尙勉諸

高堂猶可享專城  
豈以三公換此榮  
爲子惟君能盡道  
不堪孤露泣餘生

每憐吾儕賤兼貧  
斗水猶難救涸鱗  
饑口數千方仰哺  
小官今



可澤斯民

荒年民事劇何堪官食雖豐也不甘遙想縣齋孤燭夢不禁時

到木棲庵

稚喬堂號木棲

叵耐窮愁歲暮時我酬君唱廿篇期從來好事天公戲卒軸仍  
成送別詩

李副率

毅敬

挽

千里客來報桐崗葬李公平生未識面有淚自盈瞳世恥河南  
學人無稷下風君侯奮海嶠師友溯尼翁舊學今猶見斯文奈  
已窮 胃筵但備衛昭代未招弓仁得七旬壽官仍六品終試

看求挽意心訣一

缺

同



李友東謦爲壽春守重建昭陽亭以詩賀之

楚長江濶洞兼幽亭號昭陽閱幾秋題品一經清老眼風烟不  
數沮江洲

畫閣雙飛壓水濤風光舉目更奇新旁人却笑烟霞癖薄俸捐  
來不念貧

欄頭舉酒醉冥々入夜波光更弄熒妓唱昭陽歌五疊風流堪  
許後人聽

雨後

昭江五月雨新晴白鷺群飛野水平午睡起來扶杖立青山萬  
疊看雲生



主倅有十餘種歲饋詩以謝之

殘年猶作未歸人十口還煩地主仁  
晚飯匙輕魚伴肉凍厨烟  
起米兼薪眼前羅列謹兒少謫裏光榮  
聳里隣一飽欣然同老  
幼不知憔悴在湘濱

韶閣笠鐵

煮肉器

之會以病不赴追成一律賦笠鐵呈穉

聞令公要和

形似鐵冠小似鎗爛燒紅肉愛宵長  
圍爐挾箸烏巾簇煖酒調羹翠袖忙  
沙塞舊隨氈幕獵海邦今侑錦筵觴  
也知藿食終吾分感疾無端臥旅牀

和吳穉亨奇示韻兼屬庸友



生涯隨處濁醪樽一任窮愁淹峽村並土重來疑故里浙山看  
盡是君恩隻身漂轉今華髮獨樹荒涼舊墨園珍重良朋詩  
札到寸心何異對牀論

江閣誰同月下樽尺緘曾枉謫居村紫荆新灑孔懷淚白首空  
餘未報恩舊約耕釣違杜曲前遊詩酒想瓠園邇郊不見猶堪  
憶絕峽相思況可論

送別主倅李令穉聞遞任還朝

此鄉此別足霑巾聚散飄驚一夢新今日送君兼送歲窮山獨  
奈未歸人

放還後立春



及歸華髮已蕭疎春色依然又弊廬六十之年從此始百千爲  
計轉皆虛床書尙覺初心在瓢飲寧忘舊樂餘老去膠盆方淨  
盡笑看生意一端噓

泛槎亭觀朴淵瀑次板上韻

源頭政是九天來飛雪跳珠洗面埃白練誰將空外曳錦屏旋  
訝鏡中開千年巢鶴飛何去八月仙槎泛未迴最恨淵龍睡不  
起擬投虹釣上高臺

花谷書院次板上韻

小徑披尋草色籠先生遺躅此山中荒阡古廟行人拜秋葉春  
花到處紅逝水千年流不盡寒潭片月印誰同精思自得方爲



學肯信橫渠一脈通

滿月臺

城闕今遺址繁華尙古都徘徊無處問斜日下平蕪

崧陽書院謁鄭文忠遺像次板上韻

空山秋雨落荒庭萬古精忠尙有靈要識漢京千載業試看遺

廟耀丹青

善竹橋

風雨千年石蒼紅斗血痕魯公舐不得麗氏絕猶存

橋東數步有先祖文靖公遺墟碑

寂寞文公宅殘碑半蝕苔孱孫今日感不獨黍離哀



趙士鼎李聖文李和叔携杜鵑酒至趙友有詩次之

幾處人趁李下蹊老夫門巷草全齊  
迷離蝶化看書眼剝啄驢聞渡澗  
蹄詩繼后翁佳句癖譜傳杞老小壺  
携淋漓酒賦歸何遽只恐殘暉已向  
西

李水部茂叔

會祐

爲高城倅索詩賦十韻短律

鏡裏三十六雲邊萬二千早懷句漏願  
今送祖生先嶽色逢秋淨湖心蘸月  
缺牛刀雖小試鳬鳥信奇緣臥閣看  
鳥翥開衙伴鶴眠詩神應有助胸濶極  
無邊漁戶供魴美佳人割鯪鮮六期方  
滿秩三日尙云仙秋葉遊曾到春花夢  
獨牽淮陽今有主要借過山肩



又次餞席韻

一到蓬壺已廿秋送君能復說茲州深々臥閑猶觀海處々邀  
仙可作樓皂盖只諳尋嶽路白鷗同上泛湖舟塵中作吏懲羹  
久一念名區獨未休

高城權掌令

德訓

挽

魯門遺矩仰先公詩禮傳家絕海東紅紙題名嗟已晚白頭掌  
憲尙云通楓笥恨未尋湖社芝字猶思共領宮向落湘濱違執  
紼可堪追挽淚盈瞳

金友士範

遇國

惠詩仍其韻述鄉思却寄

我屋坡山下溪水流脩々平野寬其中小山環且稠蘿月夜娟



娟林颺日颺々茅屋還堪賦石田頗有秋何事戀京洛白首苦  
遲留妻子饑滿室呻吟四壁幽辛苦無此比顏色恒優々傲性  
終難矯閉門絕交遊枯腸擢空盡名塗老自休徒然送一生歎  
恨空悠々弊廬行且賣短鑊聊自謀生理何足論晚道拙可修  
耿々惟此心庶幾桑榆收但恨同庚子雲山起離憂晚契同蘭  
襲末路憐萍浮隣曲隔數日悵望還夷猶聚散自常理交誼在  
無求窮巷杖屨頻非爲無伴儔信筆寫情素蕪語豈足羞今日  
雨如此且問平安不

九月二十五日及第謝恩上御涵仁亭親受余於

先朝己卯叅司馬亦唱榜於明政殿入侍于涵仁亭今於



二十五年之後又入侍于此亭感作短律

憶在先朝日青衫拜此庭科名同卯歲恩侍又仁亭  
遑事蒼梧淚餘生白髮齡微臣感舊意徒有寸衷明

病眸試筆

永日空簾午睡回枕邊詩卷任風開起來不覺山過雨  
墻畔棠花落滿苔

文孝世子挽

篤生天若佑吾東貳極猶瞻瑞靄籠繫馬靈枝重結子  
賓鴻嘉節又流虹

凝深岐嶷聖人姿繞膝長含惠慶飴宮女織成玄袞待青丘一



日一年遲

寶冊將宣霽旭光分明天意降休祥歲星又是唐堯甲子似

寧王受命長

萬事淒涼不忍追銅龍物色已堪悲 寢門一訣琅然響父子

人間淚盡垂

迴廊寂々素帷開清漏依然報曉催小宦空宮頻起夢朝朝如  
待問安來

飄然笙鶴曉雲遙未死宮僚哭向霄猶有世間文孝字重離日

月尙森昭

李友元明

集星

遊洗劍亭有詩次其韻追憶舊遊



苦遭塵故歲相催舊賞名亭入夢來  
曲折溪流綺不定平鋪石色月還猜  
天晴遊騎松林滿日暮歸僧棧道回  
勝事飄然君獨擅有詩盈軸酒盈盃

北麓烟霞老半生戎臺魚鳥摠知名  
興來杖屨何須遠到處雲泉如許清  
尙憶秋宵三洞會每看溪月五更明  
移家更欲尋幽去不必江鄉戀膾羹

從兄縣監

德求

公旌孝立門日略述感喜示赴席諸公要

和

奕世相傳百行源吾兄亦是侍中孫  
終天淚迹蟾原草特地榮光駱麓門  
閭里聳觀興末俗矜紳齊會拜君恩  
闡揚先美知

爲孝不墜深期兩胤存

暇日登東岳詩壇共賦

滿園蒼翠客共登岳老遺吟繼孰曾短策日尋閒是主禿頭風  
灑坐全僧代言官罷能携榼吏部詩豪數展藤對此悠然心骨  
爽有誰胸裏炭交冰

南麓名園摠廢登士夫居第此何曾壇空謾集遊春客境僻要  
棲結夏僧繫馬高門餘老柳落鰭荒壁長新藤人生富貴今如  
許夜々墻頭月似冰

除夕感懷

鬢上行看六十春向來何事太勞神青山有約從兒挽紅紙無



成任婦嗔傲骨自知非俗態  
病眸元亦厭風塵  
由來飲啄皆有命  
不作窮愁惱殺人

春與監役主簿兩姪

雲柱 鼎柱

逕遊北麓聽松堂遺址石

上曾刻聽松堂遺址五字而未知的在何處故是日來觀

用文谷延謚韻

堂廢那堪後裔情人間甲子幾回更  
桃蹊競訪新開洞  
松麓誰徵舊揭名  
宣謚昔聞諸老會  
探春今見一城傾  
巖崖刻字都陳跡  
尙賴高風百世清

熙政堂晝講罷後口號一律

熙政堂高日色臨  
講官催上法筵深  
中和旨義開思傳  
誠敬工

夫仰聖心自愧空疎無素學尙煩酬酢降溫音隨行謾惹香烟  
出不禁遲回耿寸忱

大殿端午帖

袞衣新繡彩絲長蘿葛頒恩出協陽一曲薰風敷舜化三宵麥  
雨占周祥頌騰艾葉迎辰獻節屆榴花結子香聖德由來明似  
鏡江心百缺却無光

宮櫻齊結子苑柳更添絲穆々筵開卷遲々日轉霄蘭湯新睿  
德薰籙度仙韶不用歐陽諫都俞仰聖朝  
惹寵瑞靄賀筵開蒲酒新呈萬壽盃亭午更當生聖會吉祥爭  
祝自天來



太室含桃薦宮厨角黍頒天休隨節至蹈舞佇筍班

上之十一年戊申六月初吉朝家賜祭諡于林忠愍公慶

業祭文親製以下賤職以天曹郎賚來中和府宣賜訖主

人設筵以慶謹用韓學士晚裕韻略述盛事奉示在席諸

君子要和

至今天下義吾東賴有將軍隻劍雄烈々三忠同作傳轟々一

氣尙蟠空雲章擎讀瑤函裏風駕疑來篆縷中拜肅遺真增感

慨燕山何日得鳴弓

陽月九日余以天官郎賚宣忠愍公金儲諡卽己卯名賢

十清軒文簡公世弼之子而慘遭乙巳之禍受後命于北

塞今 上乙巳因湖儒陳疏施節惠之典甚盛舉也吾先祖聽松堂與旁祖大谷公亦與金氏兩世俱遭己卯乙巳之難晦跡林泉以終身雖所罹有淺深而所謂生同志死同傳者也況忠愍公之孫南谷公受學于文簡先祖其世誼之篤尤不凡也今於宣謚之日爲賦一詩志感

蘭焚忍說兔蛇年十清公後八諫聯炳々丹忠賢父繼煌々紫詰故墟宣兩家遭禍堪同傳一介含綸亦異緣南谷遺風期勿墜溪門絃誦尙依然

原州宣謚日李茂叔以平昌倅差奉函官來先有詩次其



嶠南行色又關東忽報君來似夢中  
萍水奇緣華誥奉竹符殊  
績袞褒隆悲歡更對盈頭雪聚散  
翻驚落木風王事有期挽不  
得白雲何嶺細棧通

白馬江

落花巖下艤蘭橈古國繁華逝水忙  
無限世間興廢事至今人  
笑義茲荒

平濟塔

勒石燕然自古癡只將勲業耀當時  
荒城短塔俱埋沒興廢于  
今定在誰

除夕感懷

六十人間似急湍少時營度笑多端回思過境真如夢把玩餘  
生詎足歡侍講官清題墓足孔方交絕買山難今年政待嫁婚  
畢鷗鷺前盟定不寒

八月念八日葬亾室于先壠側其日返虞宿直溪農舍素  
有歸畊之志曾成執手之言今焉已矣不覺興感情見于

詩

已矣深々閉九原靈車來宿舊田村夫耕妻饁曾成說人去山  
空獨返魂院晚功名今白髮蕭條生事但荒園秋風匹馬西歸  
路遺恨當年執手言

蕭々落葉掩門時蒙叟還兼宋玉悲依鉅愚坡嗟遠別居鰥樵



客獲先知空尊只對天中月長夜惟消枕上詩歡戚百年都一  
瞥丈夫隨遇亦安之

猶荷天恩急滾時支離攘臂更何悲臺啣館職俱能免物論  
時評摠不知今後可傾松友酒雨中先和柳兄詩楓殷菊老看  
看晚挈榼携壺隨所之

和柳友載吉

憲周

韻

邇來病廢阻時明除旨聯翩尙記名白髮已無槐穴夢烏衣  
謾作栢臺聲野心益想歸田好直氣還慙立陛爭惟喜故人留  
酒債短驂料理候天晴

九月二十五日 上詣思陵展謁還宮出東郊祇迎柳友

有詩次其韻

何處祥雲送雨來  
天教蹕路靜纖埃  
湘江竹古辰年感  
蜀魄樓新錦水迴  
今日與榮追盛典  
病臣徒恨阻叨陪  
瞻旄幸忝諸公後  
飛騎聯還暮郭隈

五月十二日回甲日也孤露之感悼亡之懷無以自抑端陽往省松楸因留過晬日

從古人間重晬筵  
老夫還走倚松阡  
弧辰尙下思親淚  
花甲幸逢生我年  
彩服持衰違膝下  
去年喪室故云  
白頭含恤泣墳前  
也知歸拜從茲邇  
樂事無窮是九泉

送成川使君

尹東晚



征蓋秋風得意行出門無適奈余情迷離夜々荒臺夢恐未偷閒到漢城

閒居無聊謹次先集絕句以消寂

戶外輪蹄戶裏翁閉門終日似逃空莫歎未遂歸山計大隱從來隱市中

石竇虛過六十年百疴惟俗最難痊一身終坐塵縲誤那得餘生解帝懸

由來傲骨與時違無事風塵獨息機不許姓名傳末路何曾耳到是兼非  
手裡陳編送短暉相尋惟有夕禽歸慙慙好在窓前菊晚節空

將歲暮期

少睡邇來甚矣  
衰寒蛩切切夜何其  
霜街呵導人誰動  
布被臥安起自遲

難得浮生一日安  
六旬何幸在人間  
霽行潦止隨吾分  
但恨無窺豹一斑

只尺紅塵脚不出  
閉門高臥即山林  
空簾晝永梧陰靜  
堦面蒼苔一屐深

宦業黃楊老益遲  
故山松桂入秋思  
諸君衮々青雲上  
獨守吾玄是一癡

百懶千慵一病身  
只宜丘壑作閒民  
銅章願得常州土  
料理長



錢得趣春

顏巷空瓢凡幾日玉川破屋又三間病中不耐長霖苦天下猶

思貧士寒

忍饑終日聽鳴腸何物貧家可入嘗脫粟侵臛聊一飽嚼來蘿

菴有餘香

侏儒自足匠樹園溲渤俱收狄相蓼也覺衰容無所用雨中空

撫子桑琴

荒唐休笑學僊家白髮人間空怨嗟多少金丹誤一粒不知臍

息餐環霞

多少農譚只待秋一風一雨摠爲愁今年水旱勞宸念幾箇陳

詩集遺稿卷之二

侯長太丘

冰啣幾度未膺命涵貸 君恩衛職移送僕江倉受散料炊烟

青裊出斜暉

贈金士範

我不出門人豈訪感君徒步惠然來晚炊脫粟聊同飽舊作詩

篇爲共開

已違下學難希聖但退中流不遠仙息跡紅塵無俗事恍如身

到十洲邊

多病年來懶起床此生何日拂朝裳憂時一念根天性不禁無

眠到夜長



紛紛世事生無已  
薄薄人情逐有看  
惟喜開窓南岳色  
朝朝不厭共盤桓

群公忍使至尊孤  
蚤夜謀家却未愚  
臺閣無言廊廟臥  
晴簾終日鬪棋盧

世情澹泊惟安分  
病骨峻嶒只拄形  
處子初心猶未變  
白頭休怪宦無成

次隣友咏月韻

葉落明禽樹星稀  
濶鴈天滿城方熟  
睡長夜自孤懸霜  
白光逾淨松高出  
更憐年年兔搗藥  
不與我爲僊

洪屏樵景厚見寄次韻以和

南麓餘興北麓幽詩翁得意最高秋黃花酒熟重陽近紅葉題  
多一社遊石出潭清頻拄杖天晴谷邃更登樓騎曹騶直須傾  
辦醉舞何妨月共留

將赴龍山九日之飲復疊前韻

登高泛棹事皆幽太白蘇仙賞舊秋有酒元非謀婦得無官猶  
勝逐臣遊江湖髮短羞塵帽霜露寒多念玉樓九日龍山誰續  
飲天教物色至今留

江樓小集拈唐詩韻

近郭無如是處閒檻前秋水與秋山散蹤暫逐隨鷗客殘夢猶  
追扈駕班浮世功名俱白髮盛時科第尙朱顏人生一會難頻



得十步回頭暮騎還

李仲輝孫兒晬盤有詩索和追呈

初度重回自有期翁心一日一年遲幾時學語呼稱祖是夕供  
懽愛過兒摩弄墨毫兆已見豐盈犀角長逾奇也知梧老陰功  
在從此孫孫繼萬枝

喜遞諫職口拈

館啣臺牒日翩翩驚罷山翁幾夜眠無逕自來公道是乍縻旋  
遞聖君憐踈慵出世終何用疾病纏身也有天怙悵故園歸未  
得苦遭塵事惱殘年

月夜獨坐

病裏工夫闔兩眸穆然清坐此心收月明虛閣琴書靜雲淡遙  
河星宿流淚盡山妻偕酒別影依寒僕伴燈愁功名自笑磨驢  
似短棹空旁宦海洲

庚友柳士寅

協基

決歸公山茲呈短律二首驢行

獻納清朝選文華近世稀伯陽知足戒巢父掉頭歸熊水童時  
釣鵠原老境依於君真得計衰淚奈沾衣

白首無歸土青山亦愛錢功名違宿志寒餓耐殘年湖鴈何多  
少轅駒自拘牽都門楊尹別行跡望如僊

暮春南麓諸公作蘭亭會於東城曲水洞華亭具尙書

庠

追到共醉病夫恨未同焉雨中愁生聊成一律奉似會中



諸公轉示華亭

四十群賢曲水頭  
傍人錯道盡情遊  
也非玉麈清談艷  
別是金蘭世好修  
繭紙醉毫誰叙述  
鹿翁追騎更風流  
臨邛未至還堪羨  
病叟關門獨百憂

贈楊州使君

李東馨

枯木生華正見今  
泮臯閒客亦冠簪  
楊州一片君恩大  
萱背三時壽酒斟  
報得春暉由感激  
方知天日照幽深  
柯橋北路通先隴  
歸騎中元定歷尋

玉署久直次箕雅  
金鑾久直韻  
進賢門外內閣東  
金鑾一路禁橋通  
十年更踏驢磨舊  
九夜徒

填豹直空孤鶴引愁鳴砌月晚蟬撩夢響庭桐懶投壺矢聊消  
日謾積床書自捲風朝飯家貧侵午報獨賢番久對庚同

楊山道中

春來幽興未全刪 聖世如吾自不關晨露何愁侵白髮晴花  
猶喜照衰顏青門歸馬行誰促芳草留人意自閒最苦臥翁誇  
句癖吟鞭終日和酬慳

堅城途中

即抱川舊號

官道沿澗見人稀石岑逶迤歷翠微王麓擬尋先墓拜青城今  
喜主翁歸郊麥連雲村色潤山花夾路客衣輝坐處哦詩忘起  
去松店秣馬已夕暉



逢芝溪宋載道次聖庸韻

長句雄名埒夢庚萬山何處獨關荆雨中書速羸驂快別後詩  
多小袋傾舊日風標高自許半生聲價覺吾輕惟君古體頗奇  
崛金水雲霞氣與橫

發向峒陰

卽永平舊號

早發青城入翠微今朝擬叩白雲扉石磴雨過溪生響崖樹春  
遲花不飛林畔路疑停馬數峽中田薄見村稀欣添二客饒詩  
興一逕吟鞭莫暫違

次金水亭板上東洲韻

繚青縈白摠相宜生老何人送有涯雲峽清遊穿野遠蓬仙遺

跡置樓危瓊沙錦水門常對岸草汀花席屢移寄謝使君風味  
厚窪樽斟酒坐多時

蒼玉屏呼韻

松筠真氣像綃面尙亭亭

思庵朴相公淳

髮爲君民白眉留山水青列

屏依古色鳴瀨想前聽未覺遺風遠徘徊立暮汀

路中次牧齋韻屬峒陰使君李士儼

兩家心契共鄉關三日金亭得往還丘壑十年人已老雲霞百  
里吏何閒三刀不妨塵中夢一路猶通海上山華髮相看嗟晚  
晚何時耕鑿杜陵間

歸臥青城

郎抱川

楊牧李令公

東馨

奉九臺偏親往季氏牲



卷古川

即狼川

衙中有詩索和次原韻以賀

聯翩皂蓋競榮親一路恩光耀晚春  
養遞三牲伸各志源深百行格君仁  
無常峽裏煒軒駟何恨人間貴鼎茵  
也識九重敷錫遍殿宮今歲祝崗新

歸騎甚促恨未留別峒陰使君今見  
兩詩不覺起興立仵次東字韻書以寄之

名山勝水國之東經濟惟憑兩縣公  
但縱遊筇探境盡不憂殘廩供賓空盤  
無菜味行嗟早展止禾淵賞未窮松耳  
木頭皆土產使君能有古人風

九月作楸行留杜谷記荒年所見

村聲無樂野光淒旱潦風蝗到處齊高地盡枯成鹿囓水田稍  
熟委蛙泥縱下恩綸蠲急索有誰良牧活飢啼利源不塞徒  
爲爾惠澤終難及黔黎

題族姪江亭

並小序

族人華柱作草亭於長浦江上徵余以扁亭余惟文斗  
先生當丙子後居杜門山中漁釣此江有詩曰把竿終  
日趨江邊垂脚滄波困一眠夢與白鷗飛海外覺來身  
在夕陽天因取其詩語命扁以夢鷗遂敬次其韻

鰲浦遙連鷺塚邊先生於此伴鷗眠長洲自是吾家有喜爾誅  
茅占水天



與諸族人泛舟上下酌酒賦詩  
招邀小艇摠吾成盡日蓬牕樂話情某水釣遊尋曩迹重陽風  
雨屬新晴楓紅欲借衰顏色江碧還羞素髮明溯上牛洲偏感  
慨諸君須念舊家聲

賀維揚使君李友稚聞花甲

人世自稀花甲還是辰況有彩衣懽羊醪想共牲羞養壽襪應  
添手線完具慶弧筵方可樂連城棣萼此尤難靈春幾樹君家  
裏唱送新詞愧幼安

贈楊牧韓季明

光近

漫浪今爲在野臣坡楊匹馬倦遊身官厨待厚還忘客旅枕眠

遲或到晨丹楓滿眼懷詩友

指抱

朱墨埋頭失主人何日共成

歸臥志石田茅屋作耕民

梅課

老夫屋一間半許書數軸客至無坐地獨喚梅妻宿梅妻絕短  
小藏之屏數曲長夜不勝寒何由破笑齟

獨葆春光滿綠枝拓窓惟看雪投籬孤山咏裏橫斜影樂窩閒  
中蓓蕾時已開紅蠟肌全露欲吐金鬚口正吹解引灞橋驢背  
客寒宵相伴酒兼詩

朝起已見數萼恰開邀詩友

老夫徹曉惟耽睡梅獨苦心殫造工剪刻艱難經月後放開容



易片宵中正須臘雪爭光潔肯向春風鬪紫紅解語東隣看孰  
勝參橫猶自醉衰翁

邀月樵花下共賦

獨伴梅妻宿無情勝有情慙勤勞閤護辛苦到房成書報數葩  
發詩朋匹馬輕荷君五字贈冰萼十分清

李德淑

種微

寄咏梅詩病冗未和

忽忽梅樹歲華闌幾得鰥翁帶笑看依舊槎枒枯骨在逐新開  
落暫時歡幸留紫蒂猶含馥恐觸金鬚不耐寒從此頓無詩酒  
興布衾嗟奈度宵難

次德淑韻

晚契猶存一朵梅  
詎隨園卉歲寒摧  
日滋造化看々別  
天賦孤貞苦々開  
煖氣獨專眠正穩  
芳心自葆嗅還猜  
知渠不是人間色  
縱到春風斷蝶來

落梅傷懷追次江友韻

一片花飛輒一哦  
光陰忽忽奈他何  
誰料落蘂驚眠覺  
却憶成房費日多  
貞竹縱槁猶帶葉  
寒葩到死尙留花  
繅翁自此宵無伴  
依舊莊園哭幻歌

次諸公永峽軸中韻屬琵琶西

小伯換司直華軒  
替短驢自牽幽興  
出終覺宦情踈峽  
路穿雲去溪沙對  
月虛聯翩五老軸  
每見上頭書



疊屬月樵

青山映白髮瘦馬隨孱驢灘客留應久楊州待不踈宦途行味  
嚮靈境步通虛溪石題名處須聯五老書

次祝石嶺韻

祝石最高嶺白雲皆在腰山鷄掠馬過林鳥見人驕北賈多乾  
鰯京僮返遠樵聯騎何處去金水興偏饒

次趙士鼎韻

猿峽哭來形詎支蛇山換去到何遲湖監宦業驢還蹋峒縣遊  
蹤鳥亦知五老未拚三夜會一樽猶可二如持無那望華餘緣  
在百里雲霞更八詩

屬呂軒適景仁

雲樓無主尙撐支爲是騷仙到賞遲  
台宿雙輝鞭共語郊翁三  
入路應知誰將彩筆能描畫  
倘着黃冠定住持回首前遊如夢  
裏雲山重對錦囊詩

次白雲樓韻

水榭兼臨野雲樓更占幽苔深時過鹿沙淨日來鷗主豈知僊  
趣奴還供客遊平泉如可賣何惜萬金求可惜芝溪逝青城獨  
二如松翁同策馬峒守已焚魚歲改人非昔樓存客不虛龍湖  
牢臥久益歎此生孤

今年乙卯卽 兩宮花甲朝家追上景慕宮玉冊加上惠



慶宮尊號正月十七日賀禮訖仍推恩文武卯生人各加  
一資煌煌金玉輝映班聯甚盛事也愚坡席上呼韻共賦  
亦追次寄梅鶴堂俾輪示霑恩諸家

岡祝纔騰紫禁春煌々金玉拜恩新虹流幸值金天世星聚俱  
膺宋卯人聖主尊年仍錫類家人節喜競邀鄰彤庭日獻南  
山壽長願吾東此慶頻

用琶西韻送趙士鼎赴稷山任所

今日離懷倍曩初官程加遠宿春餘五壬前會存三甲一友南  
歸更二如永峽雲霞猶帶面堅城父老幾攀車江村樽酒終違  
失可送湖醪伴印書

次琵琶西韻送庚友柳士寅還鄉

翩翩征袖出南城匹馬湖山雪正晴  
仲氏海裝餘豆飲小姬春服急砧聲  
君去也知多樂事我衰猶歎未歸情  
臨分莫誦隱侯句只冀加飧各保生

次韓太僕

大裕

花甲韻

幾人今年秩樞知壽考惟公善繼兒  
家國同休花甲值耆英繩武繪形奇  
錫難豈待無疆祝積德終爲不拔基  
此日此筵咸聖澤更歌天保頌君宜

楊牧韓季明以乙卯生推恩陞資兩子聯璧蓮榜次琵琶西

韻奉賀



家國同休此盛時君門喜事協攸期腰錢已重髻金耀翁甲猶  
難兒璧奇大小不殊蘇氏慶才良難辨馬家眉蓮生五朶西原  
宅積善源源此可知

太華亭小集

老夫身外叵思量到處流連送夕陽詩篋已從春後滿談鋒還  
怕醉時狂前池水暖魚心動北陸風微鴈意忙嶽寮餘醺醒昨  
夜華亭今日又詩場

效白香山體次其韻

百病千愚早自量官資折衝卽相當苦啣卸却如羈脫散料受  
來得飯嘗六莖緋衣猶不意一朝黃壤亦何傷病眸尙痼床書

癖長日消愁更有方

次香山白髮韻

老去血氣衰白髮如相期而我六十四鬢鬚雪數絲問君何因  
爾於世少歡悲通籍十餘歲冷熱都不知可笑要津客五十顏  
毛衰得寵憂失寵趁時恐失時內熱身已渴外勞形則羸散跡  
蟄窮谷起居舒体肢榮辱不經心親愛未曾離丹田恒蕩々白  
髮故遲々花時尚先登酒席長相隨但願無焦熬何勞事鑷治

次香山養拙韻

平生懶交遊長日斷鞅轅兀兀惟對卷寂寂常閉門棲身縱城  
市寄情恒丘園奈無素心人日夕共我樽冥鴻欲憎逝簷鳥亦



嫌喧養拙無如我對人還忘言但悲盲廢早未究昭曠源悠悠  
送跳丸冉冉迫歸根

又次香山覽鏡喜老韻

白傅六十四鬢鬚盡成絲而我六十四頭禿顏黑羸白傅老還  
喜而我老尤吝仕學既無成農畝亦不知但爲紅一紙滾到白  
千髭何術濟民國空名掌制詞歸山苦不早到老空自悲貧窮  
固有命富貴須何時子平婚嫁畢何事更遲疑尙可及歲暮幸  
得至年稀從今五六年宿志償庶幾倘或歸未得不願享願期  
終南送朝翠興發更引卮

效白體成律詩八韻寄陽城鄭太守

柱

兼示朴子一

陽城衙裏主兼客天澤洞中詩代書兵吏擬頻官不久畿湖換  
罷意何如兩翁長對談還少五斗雖貧醉有餘旅苦庶因友誼  
忘民憂應得麥豐紓向聞小麴全拋了更釀新醪得熟無已歎  
廣文飯不足詎能元亮樽無虛持平恩召知今矣太守京行豈  
易歟但送一壺兼和什高吟大醉慰孤居

次白集洛陽有愚叟韻

長安有愚叟爲性與人別舉世矜百巧平生守一拙舉世慕膏  
梁平生嗜粗糲衆趨輒屏退人事亦廢闕雖呼白屋寒不向朱  
門熱閉戶甘寂寞看書度飢渴是知誠大愚政云得少歇何當  
返漁樵得以具糲褐可享啓期樂庶追劉伶達朝朝想青山日



日添白髮那將野鹿性久此籠禽活愚智終難化全璞送歲月

送李仲輝之任安東

官閣臨池樓映湖屹山南下最名區瓦鱗撲地吏多富縫掖如  
雲俗尙儒暫屈金貂非左降行加玉鷺是前途憂民戀闕閒情  
少能得奚囊似舊無

休道人生五馬貴好官非久或思歸舉盃欲飲誰開抱推案相  
因輒攢眉兩盃飽後那加飯一念閒時尠到詩也識湖山雖信  
美可堪回憶社中卮

次洪稚明韻追述尹園會聯軸寄安東倅

幾度尋經此壑邱忽々已殿賞楓遊詩稀社裏憐衰境人少樽

前憶往秋酒欲借紅潮面乍菊應嫌白上頭羞元規未老猶多興近聞重新理咏樓

次安東倅寄詩韻

落落參商兩望勞離懷襞積與山高罪甘絕塞恩還渥詩得名樓氣更豪浪跡真同盜飲卓舊遊誰復善鳴騶慙遠札兼佳什却似榴簷勸我醪

吾宗商隱孝義卓然洛中諸名士以詩叙述謹次其韻

孝義嶠南奕世聲九賢芬苾摠吾成淵源麥虎由來遠彷彿筭魚感得誠海內春秋無地讀壇前日月至今明揚先一念孫能繼蕪語還慙不盡情



贈別青松使君

洪彥詰

白鶴青松歎少緣退翁詩句尙流傳不求自至方來紱  
琶下山人豈遠仙

駟騎曾停水石間千峰劒拔碧琅環清平不盡烟霞癖  
又領周王第一山

蜜在民間栢在山古人清操竟誰攀近聞太守猶多得  
豈惜分餘駐老顏

憶在立羊同射策君能剖璞我陶沙如今緋玉雖相似  
送別那堪被鬼擲

讀書尙有陶翁戒覓句那同雷老風題遍湖山詩更癖  
分憂其

奈聖恩隆

賡進華城御題韻

孺慕千年地心成萬堞城三宵依象設一雨逗龍旌濡露終天  
感流虹是日並寶幘留齋殿尤欽善繼誠

呈韓尙書光啟

尚書遐壽至如川梅亦隨人始皎然酸醎且待調羹日  
蓓蕾才催觀物篇早花灼々嗟先萎晚易遲々玩後天無那獨守著貞節肯向春風媚少年

卞園又拈蘇齋韻

園叟生涯足顏瓢却笑空花々秋餽實葉葉夏吟風旋席隨陰



密開樽坐日窮自歎身世拙無食到成翁

又拈七言韻

人間百事儘悠悠不用思來謾惹愁鄰曲相招皆冗散林泉每  
對欲歸休更聯舊社時々會喜傍名園日々遊幸免午街襍襪  
走胸襟自覺爽如秋

向叨銓部屢違 召旨旣被 嚴譴 聖教恕以生疎不  
覺感泣遂自號疎翁求詩樵老因次其韻示社中諸益

烏紗難掩野情疎素髮那逃 聖鑑虛陶逕日荒猶戀米董帷  
長下不窺蔬百年生質矯何得二字 恩言畫不如且欲抱歸  
題墓道豈徒顏扁送年餘

丙辰梅課

始放紗籠數點斑  
梅神猶喜我無官  
冰膚固厭供塵眼  
香笑那禁對老顏  
次第可知排日發  
叅差將待隔年看  
已聞南巷飄隨笛  
何不移樽向此間

每年長至愁將謝  
今日嘉平見始開  
不是天寒遲造化  
只緣翁老懶栽培  
貧厨絕爨猶添桂  
凍硯催詩輒引盃  
更伴梅妻消永夜  
臺端向我儘多哉

樗質固宜明世棄  
梅妃尚有宿緣長  
千林寂默無生意  
獨樹分明見穉陽  
緘到三冬知獨苦  
開來一夜爲誰香  
北寒南煖終違性  
正似翁心憶故鄉



二月晦日

謫裏流光月再晦如蝸小屋父兒同汀草全腥蜩雨後山花猶發瘴烟中隨身五鬼幾能送屈指三春二已空更恨幽明遲一

哭碧蘿何處葬愚公

指韓友季明

示金生樂祚

珍島界頭南復南依山茅屋似桃菴孤囚暮齒六旬六絕海佳辰三月三教在雪霜恩實大行虧忠孝死猶甘惠州尙幸非天上只把閒愁與子談

偶吟

花事遙知滿故林殊方獨奈臥深深海邊日候恒多雨島裏民

風卽近禽怒浪長時驚客夢亂山何意隔鄉心詩朋酒伴皆黃壤縱使生還定孰尋

伯殷季明皆逝故云

悼明友

踈老負辜當死矣愚翁無疾去翛然隣梅共賞仍千古島月相思又再圓天上定追韓衆侶人間今斷伯牙絃那知臨絕慙慙札髭髮猶期似昔賢

食絡蹄聯句

海物稱佳是絡蹄每隨潮落竹筐携

疎翁

短鋏在手操非網小穴

藏蹤逐沒蹊

樂祚

貪得尙看爭斥鹵摘深寧歎染淤泥

弼柱

不能千

里那遊北同是八稍胡產西

翁

常採不如諸物貴腥烟能使一



村迷

祚

百靈秘怪何無有萬族洪纖自不齊

彌

淡味還羞同蛤

婦僦生無或儷鮫妻

疎

物皆海產斯爲美地是漁村價最低

祚

玉稍煮來嘉飯佐金盤膾出勸壺提

彌

四時自足供魚鱉五畝

何須養彘雞

疎

休道臙神噉踏菜何如寒士喜啖螯

祚

春來倍

憶坡山蕨不若明朝歸去兮

彌

### 乘舟環金甲島聯句

出門無適只乘船破浪猶思極際邊

疎

水割東南分楚界天連

西北渺齊烟

祚

門臨絕海行無地身寄孤舟坐似天

彌

去里耽

羅應不百歸程京洛更加千

疎

輕帆渺々疑眞境閒日遲々似

少年

祚

楓陛遙瞻惟隔海蓬洲不遠若逢僊

彌

島孤山似高帆



過波嚙崖多老石懸

疎

海色盪胸知豁爾山光纈眼過蒼然

祚

千層古壁花香濕萬頃蒼波島影連

彌

好勇能從誰是路急流

難退却思錢

疎

青童採藥三山近赤壁和簫七月先

祚

翠嶼迎

孟俄棹後青山當飯忽帆前

彌

月遲恨未看鮫淚潮落歸應起

鷺眠

疎

槎上已知仙路邇寰中却笑世情牽

祚

奉親海上心差

慰望美天涯眼欲穿

彌

萬戶風流猶不淺漁村飯熟酒登筵

疎

### 別金生樂祚歸光山

飄然換服渡津湄契順高風又有之聯枕尙容雷起鼾對床頻  
見月生眉久隨籠鳥甘同繫還以蓼虫苦不知淚濕青衫歸未  
得可堪先賦送君詩



五月念日送兒還京

別顏慘慘兩無聲  
留者尙然況去情  
海島孤囚身伴壁  
湖山匹馬淚迷程  
南望政愁烟瘴合  
北歸猶近彩雲明  
不須此地重尋我  
聖德由來自好生

得萬戶衙後亂竹數叢移栽寓舍

牆畔移栽綠數莖  
爲憐憔悴瘴中生  
風來若帶歡心舞  
露浥如將感淚傾  
旅舍可堪無一日  
清宵好伴坐三更  
也知桑下他時戀  
應夢窓前戛玉聲

島中即事

一謫居然序四周  
病軀經夏類空飢  
潮歸菰浦魚龍靜  
日落篁

林颺颺遊荒歲逢秋民鮮樂異鄉看月客添愁訴哀永夜蛩何  
怨和爾無眠達曉籌

浮生到處是蘧廬喜靜嫌喧政我居朝醉未醒仍晚睡午書不  
讀任風舒出門或起眠沙鷺過艇時賒截浦魚更有移來金邑  
姪遠捐庖廩亦君餘

次唐律韻

絕島何人問謫愁短籬終夕對空洲寒潮朝暮惟孤枕殘角晨  
昏自成樓燕歸有日猶辭壘鴈到無書只報秋風土由來天所  
限海康諸水亦南流

次草堂韻



長洲日落成笳哀浦女村々採蜃迴環海自成南鳩俗碧津長  
阻北人來短々屋皆停客處尖々峰是望鄉臺更愁麥麴無佳  
釀空買耽羅鰔殼盃

島民以鳩爲囹登前島最高峰連捉三鷹感賦一絕

島樹蒼茫養翼成秋風萬里海雲平如何自觸虞羅裏只爲鷹  
雛與鷗爭

前山楓葉政佳

劒立諸山似搏人蒼然日暮鎖孤臣猶於瘴裏開花葉賴爾得  
知秋與春

食甘藷

甘藷出南海昔聞今始見蔓生類瓜映無花亦不緣節々生根  
葉一種一田遍秋採若蹲鴟荒年替餽麵寓舍得蒔之施蔓頗  
葱蒨那知不擇地反爲野鼠穿有童餽數顆蒸煨備早膳蘿蔔  
大還讓薯蕷甘莫擅願言得萬本儉歲活畿甸

十月二日雨

海魚不知鹹蓼虫不知苦夷面似舊識並鄉是故土不死長夏  
瘴忽已孟冬雨饑鴻集暮渚寒鴉噪古樹音書阻三月友朋皆  
千古蒼然日又沉嘆息空掩戶

次東坡雪韻

坤月闔龍競瓜牙滿空鱗甲蔽羲車人間不夜光明燭天上先



春頃刻花崖海定無尋戴棹長沙還着臥袁家兒行又踏藍關  
雪萬水千山路幾叉

金天喪皞普功纈時令立冥勅更嚴混被萬形同一色誰分越  
女與無塩踈篁月出生新影破屋風多爲複簷子厚望鄉々幾  
見朝來添得海山尖

至日次杜工部至日諸作

忘却身猶在旅床憶隨晨候入班行紫衣引道從天陛丹綬宣  
知帶御香不死居然逢暖律此生那得着朝裳惟同擊壤島岷  
樂只祝如陵聖算長

賤名猶許廁朝班千里如承咫尺顏聖世固知無棄物瘴鄉那

有不生還更逢陽動重陰底  
恍若春生絕海間  
但恐駸々西日暮  
九泉無地築恩山

待兒不至效古歌調

待人難待人難今日已暮  
明日或來行路難  
行路難冰川萬曲  
雪山千堆看他富貴家  
兒美食安臥日高戶  
方開咄如此號風  
虐雪中爾獨胡爲遠道乎哉

又成長律

海門斜景又亭々  
行色間關底處停  
夕樹已看鴉欲定  
曉簷還笑鵲無靈  
不眠素髮三更枕  
虛步蒼苔半日庭  
至性天倫矯不  
得更添無數鏡中星



贈簫師朴正雲

世事無堪開兩眼且同方叔入于河猶憐楚竹鳴々響爲和蘇  
仙望美歌

學禪

謫恨鄉思攪虛靈偶得方便釋氏經萬念都教空蕩々一心須  
使常惺々更忻明月透窓白獨對寒燈照壁青四相六塵皆弗  
染却哈湖畔泣枯形

讀書

讀書方覺靜中專剽竊如何擲盛年不有白頭嶺海謫竟孤黃  
卷聖賢傳鄉山斷夢千重隔海月開編十五圓也識此來庸玉

汝逐臣隨處荷慈天

二月二十日寒食乘舟至高巖次杜工部寒食舟中作

謫裏佳辰又食寒欲乘春水强衣冠飯醪真率提携易島嶼縈  
迴取次看雨霽花明知選日潮平風軟不成湍終然籠鳥飛何  
得園土睇陽得暫安

寓舍栽杜鵑短叢始開

客裏看花眼自驚短枝憔悴類吾生墻高獨阻仁風舞雨打空  
教怨淚傾得地明紅應帶笑叫歸蜀魄憐同情何時作伴青春  
去滿酌鵲醪醉洛城

元陵諱辰



憶霑微祿直楓宸  
黻冕天香手奉親  
蟻蓐終孤復  
土日龍光已  
被折蓮辰  
窮山尙灑蒼梧淚  
絕海空餘白髮臣  
此日那堪家國  
痛濛々春雨倍傷神

島居雜述

豈意南來春再過  
島中日月劇如梭  
冥濛海氣恒浸牖  
鳳喫潮聲日打阿  
僦室僅鋪三草席  
破厨聊掛一陶鍋  
但耽黃卷多新味  
久滯炎方長宿疴  
京國望迷勞遠目  
山坡日上立晴莎  
村童問字要傳鉢  
鎮將爲朋卽止戈  
無事時行眠鷺渚  
非漁或逐釣魚簑  
島風漸慣遂俱化  
氓俗雖頑孰敢呵  
日夕觀心同定釋  
朝哺寄食有春婆  
還如士卒戍金甲  
空想天門集玉珂  
罪重誰知



衷尚赤齒添無奈髮全皤寧憂聖世終捐棄自是疎才合輶  
軻盤饌終年肉味忘家書三月墨頂摩漁樵江上頻遊壁作叉  
島中賴導荷日落荒墟多見魅夢煩羈枕輒招魔脆兒在側憂  
還劇單僕依身責誰可不識前生何罪業方知此苦甚春磨猶  
餘舊學重尋繹恨乏良朋互切劘習靜却如耽釋氏探幽尚憶  
入摩訶脩門幾日歸來些絕島經年命也何洛水杳如沿蓬海  
碧津難似上銀河惟聞日夜獰風打不見山崖小樹鏗謫客慣  
尋求藥劑瘍人難得破癰瘻已無土產千頭橘那有湖香十里  
荷愁到劇時還少睡苦難堪處欲無叱尋常海寇驚過颿昏曉  
邊聲厭聽鑼林樾繞村薪最足藿落宜土味堪訖糲龜苟繼生



涯可醫藥俱無疾病那樵採邨氓恒駕艤崎嶇崖路合騎驟葬  
豐酒食喪同宴里具旗鉦俗尙儻所乏園丁惟菜果難名海物  
最魚鱸元城不死偏雷化賈傳何傷吊汨濯胸界每教空蕩蕩  
村謳亦喜哩囉々此心已若雲無着是處如何日有波星漢那  
有通渤潏潏江誰復導岷嶓他鄉僦屋蝸猶大洛社無人雀可  
羅却悔當年攀月桂只宜終歲守雲蘿鑒耕荒野惟君惠遭遇  
明廷足士番南繫誰憐荆缺苦西悲那禁蜀思頗興居無節而  
從我醉罵來門亦任他顏髮已驚紅白換功名那望紫青拖全  
家無食寧留洛老我如歸定臥坡遯跡何妨羣鳥獸存身今欲  
學龍蛇固知心上經營久安得眼前突兀俄秋野雲黃豐稻黍



春江月白積璫玻素心本擬遊林鹿老境胡爲撲燭蛾瘴霧起  
南昏決潏雲山迷北鬱嵯峨猶防寇盜寧無犬恐惱村鄰不養  
鵝却似蔑知投井幼非緣見嫉入宮娥履冰古訓虧吾孝吹薤  
深憂戒子科惟有酒盃寬懊惱更將詩句費吟哦歸心千里迷  
芳草哀恨終身泣蓼莪每想平生空歎息那知志業此蹉跎覺  
來誰與憂心語夢着猶欣樂事多依舊携朋尋水榭有時趁  
闕整晨靴復將朝服仗前立宛覩鑾輿階面藎一室團歡平昔  
似九原重作晤言和固知遑事黃梁枕猶忘離愁玉宇歌睡美  
不妨魂蕩佚形開還覺淚滂沱每愁矮屋多蠅蝓厭見驚濤競  
鰐鼉沿海山多同越嶠迴溪水熱似牂牁得魚斫膾無葱芥對



飯茹蔬之苴蒿自是浦邊饒果隋不勞塲裏業瓜茄冬青花發  
香猶淡大白糟多色尠醪塾社咿唔聲似鳩校書刊弊字如蝌  
讀纔孟氏歸鋤耒詩誦梁山作鑑柯鎮屬亦稱兵吏號郡班惟  
數朴曹哥也知逐島皆繁殖可喜連年少扎瘥土習不曾分內  
外方言最異喚爺孃還嫌幽俗夫子耜猶好陳風市也娑夜入  
漁梁頻蠹射秋來岷業摠鷹回家家畜犬驅麋貉島島攻駒產  
駱驛但恨村容春赤立已聞穰穗早青按蕭蕭野色非膏沃谷  
谷潮痕盡滷鹺惟喜薄田多種絮不憂歉歲少無禾村々有女  
當窓織歲歲來商作包馱浦蚌向月生光怪崖石磨波類琢磋  
遠蜃作氛晴藹々怒豚撐腹大疇々江鄉怨淚鵲啼月水國閒



情鷺浴過浦口岸頭皆置鎮峙糧繕甲爲防倭官稱萬戶無分  
土秩滿三年競待窠最恐島村潛斫伐每勞山展費瞭眼愛松  
孰似陶弘景種樹宜師郭橐駝此輩貴知黃石訣是流寧責素  
絲絃雖然暇日談傾肺解使愁人笑見瑳旣乏論文村學究却  
如呼佛老頭陀迷津滄海求羅蜜聞道彌山訪釋迦苦業何殊  
投鼻獄大悲要藉攝登伽蒲團髀有經年胝麥釀顏無半日醅  
寄信語多還錯莫得書情懶更摩沙回思過境驚猶在把玩餘  
生恐恁麼豈識垂爭分蜀朔獨無佞美類朝鮓始知行路千里  
險何恨深塹萬一蹉未報君恩甘竄謫愧隨時態作媵姍不  
才宜爾置丘壑生世元來咏軸邁瓢飲樂餘顏氏巷布衾暖足



洛陽窩長鑕短耒生宜托社酒村筵舞可傴雷雨天高何宵漠  
川原日望但陀陂固知君子無尤怨豈向傍人更縷覩一日雲  
間金鵲下先傾感淚口隨喏

讀易

聖主欲生投絕海逐臣猶望有歸年碧津水隔三千遠金島月  
看十九圓淚盡天涯兒再別音來洛下友多僊化翁餉我知偏  
厚無事重披姜里編

蒙 恩出海

長恐化爲金島土那知還涉碧波潮三年瘴海都忘苦千里寒  
程未覺遙雷雨洪恩天與大湖山喜氣雪全消此生報答知無

路歸去田間祝聖堯

于郊百里來訪拈韻共賦

穿山越嶺到溪沙短檐無籬易識家憐我衣冠留瘴色喜君顏  
髮帶韶花江皋市罷盤無味杏帘春遲酒未賒此去湍楸知不  
遠征驂挽待暮歸鴉

與于郊拈劒南韻

縛成茅屋備狐邱且愛清溪一道流寬渥已全投井孺倦耕惟  
合臥原牛但栽花柳三春計不事鋤耰百畝愁倘得好朋兼好  
酒老生從此更何求

次于郊留示韻



浩蕩遲回摠不愁  
冰江雪馬豈曾謀  
前言未赴青山約  
後會猶期赤壁秋  
已得在阿成  
邁軸尙歎無地起  
臺樓近占數畝身  
耕處息跡行藏與  
鹿遊

田家雜詠

世棄農宜業燒畚更斲嶢  
膏粱分不願  
龜糲老猶饒  
耒耜春先理鋤耰  
夏載芟雨霰熏似裘  
炎笠重如函  
水耨耘方易旱耕墾  
若劉老人看牧養  
饁婦調淡醎近服爭輸  
結遂宸尙畏暑雨麻  
方屋漏雲葉劇旗慘  
那時牛解軛無事馬嘶  
銜猷猷樂莘耒風雲  
謝傳巖最憎稊似穀  
何異珉混珉沃瘠民殊  
稟情勤天所監凌晨  
競喚耦遠役或缺礪乳燕多  
巢壘引雛語呢喃明農等聖

學祈永類民誠務穡生之本計功利孰嫌足觀唐俗在寧欬鄭  
風摻山僻樂環堵村深絕踔帆桑麻饒畝宅機杼織裳衫時際  
清明世氣和雨雪零朝廷崇禮讓班序絕諛讒賢有房兼杜凶  
無催與汜自慙矇一藝不免學三緘山裡甘巢伏草中弄兔窟  
明師黃卷聖活計白長鑱農務勗除草鄉誼戒鼓儻移花勞鋤  
鉅護屋繞松杉雌伏得林樾蟄存喜竇嵌固知殊出處寧歎不  
專咸瑞願來麟鳳災祈去惑機富貧忘孔跖得失笑荆凡涵泳  
春臺化池魚同爵淺

直溪新居十六詠

動靜元同一太極天心可見子之北晚聞下土其難哉成道何



時得踵息

子半調息

枕上鷄人解喚醒  
斑斑行墨記心靈  
老來秉燭多新得  
況乃晨窓了一經

曉枕念經

竹牖朝曦上疊巘  
床書對越肅冠冕  
老雖勤苦知何追  
年少須開一萬卷

朝牖展卷

峽裏不知啣聖樂  
瓦甌瓠酌喜還朴  
野人爭席猶相斟  
隨遇何妨自取濁

午甌傾濁

兩岐爲瑞書諸策  
民頌年年舞襪襖  
獨恨廣文飯無梁  
暮炊才飽一盂麥

暮鉢飯麥

老人居峽最宜冬  
虐雪號飢風好養慵  
櫓柁滿山容易取  
家僮且

莫日燃松

夕埃燃松

少焉月出上東岑清夜欣然會此心聖學由來常惺惺一塵那  
得累余襟

月軒整襟

幾年城裏苦寒栗夜臥難謀舒體一今日土床烟始周擁衾明  
發展雙膝

夜衾舒膝

義士逃周固可擷明時遭 聖又何齷不才多病棄惟宜歸臥

青山但有蕨

北麓採蕨

樵牧惟餘短々查春回紅濕遍山霞衰翁亦是繁華子不用移  
來富貴花

南山賞花

鱗族偏肥穀雨餘臨淵結網未全疎美茹鮮食猶兼味不必江



居羨武魚

石川網魚

數頃禾麻已罷種  
隴間窮笠立長夏  
伐檀坎々詩其知  
百億那謀不穉稼

楮坪觀稼

老我生涯園有實  
楚邱餘植伴榛柰  
無奈驕孫時竊欺  
狙公還負暮朝栗

秋園拾栗

可口甜酸多細瑣  
綠蘿如帳摠垂顙  
滿籠點柰兼丹砂  
甘棠山葡亦號果

雲蘿摘果

郭索之孫多短矮  
稻畦夜下面霜灑  
麴生最與相知深  
每設酒時必佐蟹

霜溪獵蟹

雪裏埋囫候疏趾  
駭機忽發禍由嘴  
深居潔飧那罹罨  
尼父嗅

三尚却雉

雪林機雉



踈翁遺稿卷之二

詩

金生樂祚士賢追哀四絕

並序

南軒先生曰無所爲而爲者義也有所爲而爲者利也  
義與利之分只在爲與不爲之間此一語所謂發前未  
發爲後學所宗仰者也丙辰冬余以眚災獲重罪刑配  
海島君時在光州葛田聞道路風傳語多訛或云所犯  
至重長囚絕海難以生還君疑信不能定曰豈以某公  
平生而有此乎亟欲辭家入海則君慈堂與伯兄挽之  
曰某之罪犯旣重懼累及家汝何萌此意耶君泫然曰

吾於某公義同師生雖累至罪豈可晏然已乎遂不辭  
於家密齎錢獨行至珍島海邊風濤浩渺不見涯際君  
望洋而泣計無可渡適遇鄉人負煙茶年年入海島賣  
爲業者見君驚問曰君何在此君不能隱具以實告其  
人又驚曰吾聞某公以罪囚島中君若冒入則必有罪  
且此島自前多爲重罪者謫居故鄉倅禁不與外人通  
置亭長以察之君何由濟此君乃爲之多市酒肴以餽  
之冀爲方便其人勉應曰諾於是其人分所負煙茶使  
君換服扮作草商與之同登海船亭長見生面怪問之  
則其人謾辭以答亭長亦然之君遂得渡尋到寓舍余



之驚喜可知也君卽倡義使金公健齋之後也健齋與  
吾先祖爲道義之交世好甚篤以是客習於吾家情誼  
雖厚余見棄於時至獲重譴年且老矣豈有可望於他  
日而冒官禁換商服來守濱死之人不啻累朝此豈有  
所爲而然哉余放還退居于鄉廬越五年春始聞君病  
歿于家余又移居萬山中遷徙棲屑尙不能誄君之死  
月前爲赴國祥入城按淚作數絕句以哀之云

怒浪如山瘴似烟驚君剝啄出門前顧余敢比坡翁役契順何  
由到惠天

蓼虫忘苦魚忘醎幾見東櫺月色啣向夕浦漁多牡蠣此人同

嗜喜同囃

清明酒譜是何方  
喚婦親釀琥珀光  
爲我謫中難理遣  
黃岡不待武昌舫

萱堂鶴髮底辭慰  
螟誨多年幾許長  
白首深山徒隕涕  
重泉應有一逢場

坡山書院講席次兒輩韻

歲壬戌十月初一日己亥爲設坡院講會先一日戊戌  
自直溪詣竹雨堂拜別廟翌日曉尋院與有司具修彬  
掌議李得新成載典暨諸生應講者廿許人同行焚香  
禮退出察倫堂答諸生庭揖于南榮仍令分庭相揖遂



許陞座東上北向以齒爲序前期使院儒圈推講長有  
文學者二人而皆有故不來乃於會中擇直日一人使  
之糾察不如儀者年十五以上至四十講大學章蒙十  
五以下講小學始自序文讀之以齒次次遞講多少隨  
宜盡篇而止正其音句論其文義四十以上老不能讀  
者亦皆叅座聽講如大學月三講之規甚盛舉也翌日  
以病罷歸用兒輩韻追記其會云

絳帳幾年今始開白頭多病此能來松風溪月淵源地絃誦洋  
洋復一回

與沈友敬希

相送江扉絕鴈憑  
忽蒙華翰益龜朋  
蜜房割出松花熟  
狼谷分來雪色凝  
荒海幾年吞炎瘴  
蔗漿今日滌煩蒸  
直溪病蟄無由動  
空憶當時共伴燈

次洪咸興叔章

彝浩

歎老詩韻

至樂無如老佚我  
々何悲世人昧此樂  
爲君詳說之  
老佛要超脫  
偃佺與侔尼

釋迦牟尼佛

生也與憂俱瘁  
此媚々姿皆如鵝尾魴

孰使遊蓮龜空悲  
時日化陋彼王波斯  
帶索而鼓琴達觀是啓  
期青春獨勞形白首  
方展眉鄉黨推達尊  
朝廷優耆耆支離笑  
攘臂老不乘邊陲  
家事且傳重偃便  
尤自茲窮達在彼蒼  
濩落又何噫  
年少酣豢客惟願日遲々  
那知冉冉景已自在胎時紛



紛馬頭塵忽忽駒隙曦夜與月俱逝晝與日俱馳富貴如浮雲  
何事謾朶頤不知是夢幻役役爲滯移及至血氣衰心閒意自  
怡少輩雖嫌避名塗孰猜疑當肉有烹芋嚼果有燒梨時歌堯  
老壤閒垂子陵絲塞充但守黑垂簾不妨眇綿綿學踵息無賴  
大小司固知有此術但恐於道離 聖朝善養老五畝足無飢  
君子貴安命體物寧或遺生老與病死屢傾匪木支歎嗟將何  
益畢竟同萬吹隨遇一任彼方履坦途夷爭席亦不嫌逢人休  
問誰世間多少事不如老無知世亦棄君平雖知竟何爲最恨  
讀書寡旣老愆尤追賤甲過一紀看看又律蕤娛老欲稱觴孤  
露匪所宜雖憶少時事安得老還兒自以同病憐聊和歎老詩

何時策病軀合席同一卮

訪安友廷鐸山庄留飲呼韻

秋風匹騎出喬林鷄黍何家有約尋開檻剩教山翠滴近城寧  
許俗塵侵鉛槧共業懷前跡盃酒聯襟話舊心老馬爲駒眞可  
笑終年憂憾奈停吟

甲子元朝次尹友仲郁寄示韻

七十三年如驥馳光陰冉冉孰能追復來已謝范公仕適去猶  
遲夫子時滿案詩書如舊業近簷花果欲新移尙思身外無窮  
事一任傍人笑我癡

上元效長慶體



望日尙無明耳酒山家況有處容錢淡飯苦茶聊一飽藁簾終  
夕坐如禪  
人々候月上山東旱潦何須問老農召災也在蠻爭觸致和無  
如藁讓龍  
憶在長安逢此夕風鳶月炬任諸兒鄉居今日慵難賣不許家  
僮喚暑癡

晚飢次白集韻

岳樓食後景浩氣穀中生調息綿難續吞津腹但鳴淒涼稚子  
色慘懽老人情七臺書惟癖終矐向牖明

齒痛

固知朝暮落何耐嚙呻情左右牙交痛東西枕豈平古仙四九  
訣方藥百千名無奈老人病齟空後可寧

和尹仲郁評詩韻

老去百年深閉荆病吟那得括眸明但嫌雕飾趨時俗只取平  
淡出性情後世敢期楊子遇吾兄錯比李翱鳴阿其所好評何  
過撫掌應多陸士衡

香山壬子生也其詩云七十人難到過三更較稀余年適

同仍用其韻成長律

雖同白傳年壬子少也何曾望過稀早病今爲青白眼冷官才  
着綠緋衣備嘗險境無如曩把玩餘生不若歸富貴文章天壤



別品才論命似而非

次香山小草亭韻咏所居草舍十二韻

堯宮不剪茨况此賤兼卑不斲柱何礎無繩木半皮放鷄樊護  
圃防虎網當籬徑喜搬泉近簾妨待月垂室深冬暖夜窓闌夏  
涼時隔壁容諸少向明對聖師窄寬心所主寒燠老殊兒塗薄  
才埋土竈虛不事炊拙構豪更笑卑屋賤多欺良背窺何見貴  
園吉可知存身龍蟄穴擇木鳥安枝隨分於斯足樂天更底爲

次香山阿崔韻咏阿雛

遺腹有孤子含飴卽老夫衰腸方寸々驚臆尙瞿々憐爾質如  
玉滋吾淚墮珠是知亡不死可謂有生無幾世家詩禮四方志

矢弧慧知觀敏鈍啼笑見憎娛祈耇佩嫗髮養卑着賤孺疾惟  
憂及我孝或弄傷膚文學期繩祖畸窮戒似吾只期如耳壽所  
望似顏愚瑞物非凡介賤名是曰雛崩城且止哭哺反有林鳥

食山菜

眉對春盤展山婢菜忽傳香蔬纔鼠耳新蕨若兒拳肉食應多  
鄙魚腥却易捐漢陰方抱甕圃種又綿々

偶吟

老者閒居靜固宜簷禽噪聒尙頓眉流顰百轉調頻變乳燕雙  
棲語可知行野有時隨耒耜看山止步倚筇枝平生白集長携  
手愛醉耽詩孰勝之



折松筍作酒少醉

松節新方出禁譜松肪遺法自先祖不如折取筍初嫩滿碗芻

來飽晚肚

松節茶自英宗朝  
松肪酒出聽松先祖

直川風土雜詠

直川營產爲桑麻南北東西道險巴六七村家巢似燕數三人  
姓聞如蛙曾無俗客來相擾獨有淳風也足誇遠水穿蕪翠帶  
去小山圍野錦屏遮南東疆畝開方野左右排巒擺早衙峽裏  
自來饒雉兔村中何必養鵝鴛業資鶉首甘終窶持狹豚蹄反  
欲奢山叟對居欣有耦峽川潦急恨無舠巷瓢安分寧眉攢髭  
玉居卑或手擲春採偏宜茹朮蕨夏綸時或出鱗鯨聖居夷域



知何陋寶產崑岡尙有瑕小屋依山稍面勢柴門對圃不偏袤  
牧人見客騎無下椎髻來庭手豈又頑悍徒知猜弁冕蠢愚猶  
昧弄機牙旣俱未見儻籛豈不淑何煩咏笄珈京賈每棲樓店  
夜近商多赴葛橋沙鬱惹昔號陳陵樹爛熳今餘尹洞花市遠  
只耽周顒韭身卑宜種邵平瓜枯松烘埃眠方穩燠鼓懸樑臭  
欲哇燥多種黍沮多稻夜畏盜牛晝畏蛇官府路遐訐習倍土  
班交等笑容呀三州界接殊婚嫁一路山深罕角笳浦市換鹽  
柴作貨灰堪熾火樹餘查跡同尙父釣於渭池應天騏出自注  
玉骨瓊姿仍鍾毓畫眉玄髮暎鬢髻呌啼墮地曾驚衆匍匐踰  
檻似越訝漢廟可期具柱石秦驂不數駕驪駒卜商縱抱明喪



痛杜子那噴鬚挽誨掩坎入瞻差慰意崩城置膝且寬嗟芳洲  
有樹時觀釣小渡無舟故着槎巾角挾書皆史鑑儒冠論學尠  
詩葩遊春未敢隨年少結夏還同學佛迦衣笠空多隴斷賤干  
城寧有野人置政宜隱者居盤谷獨少翁亭置秀瑯最怕深山  
多虎豹敢云明世絆騅驊飯甘隴麥猶能飽酒憶邨筒不用賒  
深峽何妨居木石慚鋒可避利干鉶繞堤柳綠鶯歌滑滿野禾  
青鷺影挈事不營心閒似鶴室求容身小如蝸猿嘯孰反招淮  
隱鳥道無愁過蜀斜採盡北山無繼蕨開來前圃更移茄耕牛  
脫耒多休野巢鵲含枝競上杓里近客無騎角鬣市賒人少賣  
魚蝦農談日聞理漸悟世耗風傳語或差一變豈能躋魯俗兩



冬徒爾閱秦嘉縱期此樂於無己其奈吾生也有涯臺時熊潭  
時釣鯽谷名豚窟獨無麝便身杖履行尋藥可口葡萄味勝樵  
歸里固宜還野服背時無復岸朝紗譽何爲喜謗何慍有則當  
祛無則加誰謂居窮當不得想無阿好至於汙朽姿已作先衰  
柳物理要觀後落杷只伴老農燒火畝獨無商婦卜金釵也知  
鄉女能抽繭詎有京娼說住幙蓬髮自宜勞杼軸縞衣誰樂出  
闔閭輪蹄日開時人宅風雨長關處士家師在方當爐煉藥客  
來無復筆題芭丹田未運周天火絳闕那成滿鼎砂茅屋惟期  
從許拔塵膚長願得麻屨犬吞鷄啄皆丹粒虎躍龍奔是紫車  
正則何曾遊汗漫女嬰徒苦責修姱休誇直道瓊垂佩終見讒



人矢滿鞬誰毀夷清同跖婪或將孤娶誣翁媼是非自古亦聊  
爾哺啜隨時何害耶謾作哀騷吟綠芷不知仙道養黃芽苟能  
眞息移機竅肯使天翁弄悴華須結聖胎膺列籍可憐凡骨類  
浮苴棲神每戒猿奔野滌慮常看鴨浴窪閉牖豈爲聲利累坐  
寰惟喜市朝遐穀山如得從松子湘澤何勞喚楚些與獸同羣  
騎白鹿懷人道阻咏蒼葭嬰兒知是生交震姤女還疑自館娃  
義易固明車正軸楊朱何泣路分丫俗人到室還懸榻丹友來  
門喜熟茶齊士禁方豈永水魏陽眞訣反籬笆猶全殘喘歸隴  
畝尙泣隆恩脫犴架溫養子珠能踵息幻來塵骨等瘡痂刀圭  
入口方生翰灰木棲心是着裘離坎可推出洛範鼎爐須待補

天媧眞工畢竟歸三象王道方成發五羝少日功名雲過影老  
年塵穢雪灑渣三間屋裏身如植五夜窓前坐結跏號以道人  
宜拙約肯於浮俗事叱夸徒慙半世園無菊却悔多年崖上琶  
千里爲邦誰變理三旬下雨失菑畬村々泥沒夏乘桐處々田  
荒魯婦鑿長日黑雲低壓地何時黃襖出透霞霧皆北去々何  
積雨自南來々復斜自是民情咨暑雨譬如人疾喚嬾爺飛類  
氣先巢墮燕老眸雲暗字成鴟諺云瞽者晴猶喜久雨方祈頌  
亦佳

九日初吉贈別獅孫李圭成

汝生鳳棲衙

卽丹陽郡

寔稟龜島精龜島氣清淑犀角自豐盈譬如



不羈駒志在千里程余時遭逆憾徒步來哭靈數宵扣所存天  
質習可成腹笥蘊富有眉宇見粹清簪組等浮雲不須策科名  
忠信是爲寶孝悌仁可行紫陽傳獅畫只冀獸腦驚

咏早寒寄尹仲郁

今年陽月太兢凌變理巖廊問孰登明漢弄熒搖列宿暗灘鳴  
咽聽堅冰鵠鵲夜叫暄無驗蘿菑根長諺足徵鰥叟寒衣誰授  
否擁爐開樽恨無朋

甲子除夕感懷

風雪蕭々殿晚寒紙窓深閉坐調丹世間無恨難平事伯玉知  
非又幾端

受兩閩歲饋謾成五排十韻

兩閩有前例年々饋歲新視班多寡異修禮密踈均魚大合雙  
尾鮑乾束萬鱗華虫供聖嗅清蜜佐援身草細壠栽異履寬野  
步頻惟甘海鮓美或惡關魚辛那意遯荒跡得同摺笏臣於焉  
作歲況又以及鄉隣飯飽扶衰氣口腥夢臙神也知朝體是恩  
暨亦由宸

又次杜工部九日藍田韻

禿頭那耐帽圍寬任被龍山作笑歡咬菜剩收樊子圃受壓猶  
着許行冠白衣仔待無來酒黃菊蕭疎不怕寒明歲此辰倘復  
健籬葩晚節可留看



疏

辭副校理疏

伏以臣猥以庸陋晚竊科第曾未屢月遽叨一麾恩寵已極殫竭是期至於榮道一步初非夢寐所期不意臺通瀛選次第濫竽前後除旨非止一再而輒事違傲一未承膺者此豈臣得已而然哉顧臣自在少小素患阿堵經歲瘴邑一倍添頤源委既深鍼藥無效今則左眼已廢右目亦昏尋常視物尙爾難辨出入橫經已矣無望方今 聖學日新文教丕闡在廷羣僚共霑鳶魚之化思效犬馬之誠而臣獨身嬰奇疾跡阻前席庚牌屢臨轉動無路 寅陛遙瞻戀係徒切臣之尤所自悼者臣早歲

銜恤恒抱不洎之痛晚年通籍幸有移事之地而命道愈窮疾  
病遽纏值茲明時永爲棄物撫念身世徒增傷痛臣自還朝以  
來固宜一陳病狀乞寢誤恩而煩瀆是懼泯默至今月前違召  
幸蒙恩罷就醫桑鄉杜門調疾不料除命又降駟召繼臨含恩  
畏義力疾登道昨始還次而病形如前進身末由茲不得不冒  
入文字仰瀆崇聽伏乞 聖慈俯賜諒察特遞臣本兼諸職且  
治臣逋慢之罪以肅朝綱以安私分焉臣於乞免之章言病不  
暇而區々執藝之誠有不能自己略此附陳焉夫瀛館之設兼  
以經筵不但治文翰備顧問而已蓋將以講討經訓成就君德  
則責任甚重其不可一日曠其官而闕其直也明矣第伏見近



日以來兩番頻空或至屢旬方值盛暑雖停法講而無時召對  
不行亦久矣伏惟我 殿下聖質天縱睿學日將聰明博洽洞  
貫天人今日之出入經幄者固不足以仰望清光小稗下風是  
以執經發難未聞稱旨之對應文開講全無沃心之效竊料我  
聖衷臨筵少味撫卷興歎晉接自致於稀濶瀑直一任其闕  
空玉署華啣便成冗散而 臣愚死罪竊不勝憂歎焉盖察邇間  
寡聖賢所以益智之方詢堯擇狂帝王所以致治之道聖如堯  
舜而尙資臯夔之都俞學如衛武而不廢誓御之諷誦則今日  
廷臣雖無臯夔之賢而若其誦說章句則豈不猶勝於誓御也  
哉夫人君養德全在經筵自古儒先莫不惓々於斯方其法服

臨筵衿紳列侍磚陰方永爐薰時升對黃卷之聖人講青編之嘉訓則竊想是時聖心欽明如日皦然其持敬存心之功必有勝於居潛處獨之時矣又況我春宮邸下性質夙就智思漸開早諭之方勤學爲先而尙在衣尺之齡未及就外之時則觀感之道只在於我 殿下矣 臣固知我 殿下慈愛方篤期勉無窮自內導迪之方固當靡不容極而然而耳提面命不如示之以事養正陶德莫若教之以身則在今日貽燕之謨尤宜日開經筵頻接儒臣且使我 邸下時陪座側獲瞻法講之儀親聆誦讀之音俾知學問之不可不勤講討之不可暫輟則所以感發於觀聽之間者必倍於遇物過庭之誨矣方今新涼漸



近講筵將稟臣願  殿下另飭本館勿使空直兼招抄選之臣以充講讀之任日勤三晝之筵輪討六經之旨則不但有補於益聖之道亦必大益於裕昆之謨矣臣素無學術重以奇疾文館供職此生已休而不勝耿耿之忱敢效草々之說伏願  殿下勿以人微而廢其言焉臣無任云々

辭獻納疏

伏以月建陽生運屆泰來彌月之慶指日而待匝域頤祝大小惟均仍伏念臣阿堵宿疾已成癰痼前後除拜一未承膺悚蹙之私已悉於年前辭疏不但通朝之所共知抑亦  聖明之所俯燭春初館職之黽勉一肅非以昔疾之今愈盖欲微分之粗

伸伊後宣謚之行掌試之任義在徃役誠切奔湊擔輿來徃殆  
五千餘里矣溽暑外爍勞熱內熾膜瞖復盛眇痛轉劇今則左  
視遂癢右目亦眊兼以偏頭之症受風闖發閱月叫苦不省人  
事近日以來府垣除旨乍遞旋辱揆以義分固宜踴躍而病狀  
如右尙未出肅伏枕惶蹙如負大何此際憲疏以向來韓宗纘  
差祭事論臣持臣遣辭甚峻臣實懼然莫知其所以也蓋當仲  
秋之月文廟社稷陵殿諸享文官應差其數甚多臣於行役之  
暇初當是事抄出在京無故從前見差之人分排報府而韓宗  
纘名在從案前後差享非一非再且其族人之通文籍者亦有  
二人而文廟享官未嘗有礙故臣亦按例分差初非有心今此



臺言實是意慮之所不到也若曰病昏生疎不能審擇則臣當受以爲過而其曰惟恐不及必差乃己有若臣心有顧惜必立己見者然臣與宗纘聲聞不及則有甚關緊而必欲填差如臺臣之言耶臣固不欲與之較卞而職在臺地名登白簡滿心慙惡無地自措官職去就尤無可論嗚呼時序易邁仲冬又屆文禧廟享親行有命栗園寒日法駕遠臨臣以雷肆舊僚職忝法從而蟄在床第跡阻陪班有臣如此生不如死賤疾沉淹如在昏霧數行辭草末由自力今始收召精思略暴情病伏乞聖慈俯賜鑑諒亟削臣本兼諸職以謝人言以靖私義焉噫以臣所遭固不敢以言職自居而懲討大論夫人可言且臣向隨

賓僚之末粗效沐浴之義而忱誠未孚讎賊自如今當文字之  
猥陳豈以煩縷而終默嘻噫痛矣誅逆而未破窩窟治獄而不  
覈根柢自丙丁至于今實爲難言之憂不測之慮而三司故紙  
殆積公車二字例批便成文具至於窮兇極慝之若醫若媼元  
惡巨慝之曰宇曰偉真賊畢彰斷案已成而尙道當律毛髮不  
傷只施薄竄首領猶存此實舉國臣民沫血飲泣如不欲生者  
也惟彼四凶之千罪萬惡國人知之諸大夫言之臣不暇更事  
掇拾徒貽煩聒而試以天德王道論之春生秋殺四時之所以  
成功也仁煦義斷聖人之所以成化也若或當殺而不殺則生  
物不得遂焉當斷而不斷則仁道無以行焉 慈聖十行之教



半夜誕降則此賊之罪其可不殺乎臣子一天之冤三年未洩則此逆之案其可不斷乎竊聞我  殿下睿智邃學卓絕百王天人精微之際靡不洞究事物酬接之間莫或遺漏而獨於懲討一事惟務姑息尙靳允俞使義理益晦而倫彝不明此臣所以不能無憾於天地之大也嗚呼無情之日月如流有限之禮制已訖以春秋不書葬之義言之旣葬而祥旣祥而禫蹉過今朔此歲又將盡矣而凶醫則移置善地妖媼則任渠自在顧瞻他日鞫庭結案之賊書貨潛通隱憂無窮不滿邦慶文書有證之逆籬棘不加防守太踈三尺之典憲無時可伸一國之悲惋與歲俱深古今天下寧有是耶伏願  殿下穆然深思赫然夬



斷亟允三司諸請以洩冤憤以昭倫綱不勝幸甚臣無任云々

辭副應教兼請新谷書院復額疏

伏以禮展陵寢 聖孝克伸躬享苾芬法駕穩旋臣民慶幸曷  
有其極仍伏念臣素患目疾換節必添日前郊班觸風轉劇歸  
伏床茲達宵呌苦玉署除旨又下此際而無路蠢動尙闕趨肅  
有臣如此生不如死噫講讀文字之任實非賤疾所可强承竊  
想 聖明亦已俯燭而屢欲恩除輒犯違傲上以煩濫授之恩  
下以積慢命之辜以公以私關係非細臣何敢以煩瀆爲懼不  
思所以申暴也哉茲又略控短章仰干宸嚴伏乞 聖慈俯垂  
矜恕亟削臣職且治臣罪以安私分以肅朝綱焉且伏念臣病



廢多年塊蟄委巷凡於世事一切聾瞽曾不敢出一言論一事而第臣於日昨郊迎之際竊伏聞道路傳說交河儒生等以先正臣文敬公尹宣舉書院復額事露章蹕路竟阻天聽臣竊爲之歎惜也嗚呼先正臣父子道德行誼非臣末學所可贅論而列聖朝禮遇之盛我  殿下繼述之美始終不替存沒靡間則惟此一院額之或輟或復何足損益於先正而臣所竊歎者向來兩臣復官之命實是  聖上特達之恩德音渙降爵謚如舊則院額復宣自是次第件事伊時該曹固宜按例舉行一如前日而在苒歲月因循至今不但士林之缺歎實爲朝家之欠典今其祠廟適在過蹕之路故數十章甫乃有封章之舉而道

次倉卒竟未自達憫默彷徨抱牘而歸將使未泯之公議更致  
湮鬱特復之 聖恩未盡宣揚臣於此安得不深有感而重自  
恨乎伏願 聖上特加諒察亟命該曹復宣院額以光 聖德  
以副士望千萬幸甚臣無任屏營祈懇之至

辭副校理疏

伏以臣信心直情不識忌諱向來一疏不過仰體 聖上特復  
之盛意申請該曹未遑之闕典初非卞訟有甚觸激而不意吳  
鼎源之疏出矣挾摛臣疏構成罪案斥以悖慢律以無嚴其所  
醜辱殆無餘地夫悖慢無嚴自是人臣之極罪言之者雖若容  
易當之者寧不顛掉臣疏本意但以朝家之禮遇爲重祠院之



小節爲輕語脈文勢自歸如此有何近似於此等罪目而彼乃截去頭尾抑勒爲說此輩此習臣實痛之然而是則猶屬臣一己事耳至若禮禋等疏中一句語用意至慳遣辭絕悖雖幸

聖鑑昭燭深惡痛斥原疏留中不令傳播而草本先出於泮庠遽言已播於遠近公議大駭士論齊起以至於京儒伏闕鄉儒裹足竟未登徹尙抱冤鬱在他人猶復若此況臣崩迫之私尤當如何雖其悖戾之習急於構人譬如街童市豎無所知覺戟手詬罵略無顧忌世道之變斯文之憂將不知至於何境噫嘻痛矣黨習之陷人心術厥惟久矣而豈意平明之世有此陰慝之類乎其無倫無憚之言臣不欲自污其口與之呶々而只緣

臣出言不量自取危辱一則臣罪二則臣罪自有此遭罹窮蹙  
之情無由一暴蟄伏之蹤自分永棄恩除雖出於收簪私義實  
難於彈冠茲不得不隨牌詣闕瀝血籲衷伏乞 聖慈天地父  
母察臣危苦之情憐臣窮阨之踪亟命鑄削臣職名仍令選部  
勿復檢擬以靖私義以快人心千萬幸甚臣無任云々

辭應教疏

伏以臣以情以病不敢自齒於平人前後館啣一未承膺向叨  
郎職亦犯傲慢之罪旋因相奏重速譴罷之典惶隕惡蹙至今  
未已間奉除旨復事違通而 聖度天大特蒙恩遞既感洪私  
且安徽分不意茲者又辱恩除矧今園幸在邇玉體勞動此時



言私實非義分之所敢出而第臣自來情勢雖以 聖明在上  
有未悉燭事雖既往義難終默敢此略陳以冀垂察焉蓋臣於  
昨年論一院額事大觸時人之忌嫉拳踢交至扶摘爲言加以  
無嚴之目驅之罔測之科至今追思心骨俱驚伊時卞章雖未  
登徹而 聖鑑孔昭察燭無餘臣不敢更事煩瀆以犯無卞之  
戒而自是以後屏跡齟舌自分廢棄從班一步便同鐵限今若  
感激恩數唐突承膺則是豈臣自靖之本義哉至若大臣筵奏  
之言則尤爲臣難安之一端臣與大臣家果有世所共知之嫌  
而是非既定年代且遠公朝體例雖或隨衆而一府周旋太無  
防限此是臣家內之素所論定者而這箇處義古今人亦多行

之者若其時往復之際在喉院則告君之辭也不敢不詳陳之於大臣則相敬之道也有不得直說之臣於此自以爲裁量有據而驟以觀之烏得免顛倒之失乎大臣之執是而責臣固也臣實瞿然自省之不暇今何必逐段分疏以傷事面也哉由前由後官職去就已無可論茲敢冒入文字仰干宸嚴伏乞 聖慈俯賜鑑憐亟命鑄削臣職名因治臣前後慢命之罪以肅朝綱以全微諒千萬幸甚臣無任屏營祈懇之至

辭司諫疏

伏以臣素以目疾便成廢人分於 聖世永爲棄物臺館除旨一未承膺揆以分義誅殛猶輕又自夏秋以來疾憂喪憾薰心



消精風眩並作眼視益昏尋常書札每多倩人而看咫尺房闥亦必待杖而行以此病狀實無從仕之望迺者仁天示警轟雷告異  聖心震惕至下減膳之音繼有求助之旨況臣所叨名以諫官在臣道理固當踴躍趨肅以效一日之責而宿病之外添以頭風淡旬叫痛不省人事只以姓名附陳於聯劑之末不誠之罪尤無所逃有臣如此生亦何爲茲不得不更入文字略暴實狀伏乞  聖慈察臣癰廢之狀憐臣疾痛之呼亟將臣職並許鑄免仍命選部勿復檢擬且治臣前後逋慢之罪以肅朝綱焉仍伏念臣庸愚衰病固不敢以言責自居而第伏見昨日傳教所以遇災警惕之誠求助惻怛之旨有足仰驗於數行絲

綸之間臣何敢以名在聯劄謂己塞責以孤我 殿下各陳昌  
言之教哉臣竊觀我 殿下聰明冠古睿智超凡敬天勤民之  
德綜事理物之明求諸往牒無與倫比一令之發一政之行動  
合典則無可非開則宜其天心克享善祥沓臻挽近以來水旱  
霜雹無歲無之至於今年早早晚滂峽野俱病當寒伏陰淫雨  
妨穫天之警動我邦家仁愛我 殿下者不特轟々之一雷耳  
臣不敢知某災爲某事之應而竊觀今日亦豈無致此之由耶  
伏惟我 殿下聖學高明文理密察凡於注措之間自無闕遺  
之歎故所以承佐於下風者雖欲自出意見少效慇懃而舉莫  
逃於 鑑衷之內範圍之中是以甘自退托徒事循默上以有



獨智御世之漸下以無竭忠擔事之人。殿下雖思奮發一心  
董飭百工而諸臣之唯諾趨承不過如懶僕怠隸之苟免笞罵  
而已以是訐謨之臣未嘗殫心於籌國故詢咨之下自致筵對  
之苟簡銓衡之地未嘗留意於蓄材故排擬之際未免政望之  
屢易臣見其殿下獨勞於上羣臣反逸於下有君無臣之歎  
莫今日若也雖然愚虞智秦自昔已然倭隋忠唐惟君所使以  
此而言臣竊恐我殿下推誠責成之道或不如古后而然歟  
臣又伏見殿下前日下教於臺臣者以無言二字諄々誨飭  
臣竊欽歎我殿下洞燭今日之痼弊也伏況我殿下臨御  
以來未嘗罪一言者逐一臺官宜其嘉言讜論日集殿陛而十



數年來嬗嬗衰靡日甚一日雖欲出一言論一事而惟恐有觸於時諱不敢稍異於物議以含默爲能事以雷同爲時體此莫非羣下之軌轍成習愛身忘君之致而竊恐我  殿下或不能虛心無我舍己從人有欠於來諫之方而然歟雖以近日事言之臺閣之設所以開耳目也自古城上之啓豈無過中之語而或從或違雖在上心之當否不允不停自是臺閣之体例盖或有忤旨而獲罪者抑豈可設禁而防來乎臣固知我  殿下惡其浮囂之習出於鎮靜之方而壓筭猶生壅川必潰若使臺閣之所論執果出於一國之所公共則  殿下雖以雷霆之威亦恐其消鑠不得矣然今日臺臣之逐日論執者特一狐狸而猶



且靳々不已上下相持徒傷國體昔者文成公臣李珣以宣  
廟朝臺臣爭執小事致有君上之過舉謂之無識特筆於日記  
之中以此言之今日臺臣亦可謂不知輕重之倫者也雖然以  
聖人物各付物之意惟當略示開納少答輿論而奈何竄逐之  
太劇摧折之過嚴至于今紛々如是耶臣竊爲之慨然也臣病  
情荒耗文辭短澁草々論列誠不足仰概 聖衷常叅有命又  
未得趨造於末班瞻望宸極徒切耿結臨楮涕泣不知所裁臣  
無任祈懇激切屏營之至謹昧死以聞

辭執義疏

伏以臣情有自劃病亦難强杜門跼蹐絕意榮途復豈有抗顏

趨朝之理而前月除旨適下於玉候違豫舉國憂遑之日拚棄  
廉義冒肅職名乃以焦迫之私妄效瀆擾之罪何幸天和遄復  
筵對有命獲借方寸之地粗陳沫飲之義雖緣誠意淺薄未回  
天聽而尙喜義分少伸得觀耿光退而顛壑萬々無限屬  
被相規之公議猥陳自引之私懇蒙恩遞職隨分屏伏曾未多  
日除命又下選部視臣爲無故之人循例檢擬聖上未燭臣  
自靖之心每辱甄錄感惶之情豈欲遂巡病蟄之蹤自犯違通  
聖度至寬例勘亦靳臣於是尤不勝悶隘罔措之至噫臣受  
性甚愚未諳裁量之宜有懷斯陳難免踈闇之失至於向日黃  
鍾五事大關風俗難容泯默宿有所蘊于中未免信口而發事



近瀆屑語欠忠厚至今追思尤悔無及若臣之愚見則本出於重倫而人反責之以口氣譬說自附於勵廉而彼乃斥之以貽羞有若極意吹洗者然臣未知何故也顧臣癰病自廢者不守三緘偶發一言詆斥之來有辱身名尙何顏面復廁周行乎茲敢冒入文字略暴情實伏乞 聖上俯賜鑑諒亟命鑄削仍令選曹永刊臣仕籍俾臣得以投閒處散調疾省愆不勝幸甚

辭吏曹叅議疏

伏以臣卽一庸憤癰蟄之蹤耳據不入俗世與寡合雖在盛壯之年猶不足以備使令之末而祇以先故之故持蒙曲造之恩清顯之地駁歷殆遍居然到下大夫之列榮寵極矣涯分溢矣



此生此世無地報答惟有退守拙分詞詠 聖澤庶幾爲一分  
塵刹之報至於清官美職世既不以是而待臣々亦不以是而  
自期乃者三銓除旨忽下於委巷跼伏之中恟怳踖踖誠不知  
措躬之所也噫朝廷官爵迺所以勵世磨鈍之具也無論大小  
孰非難慎而至若銓選之職責任尤重甄注之權雖在於長席  
通塞之論亦關於下佐苟非地望足以壓服鑑識足以區別者  
莫宜居之况臣榆景已迫蒲質先衰一切世事都付聾聵昔人  
所謂平居之時開口妄發接物之際回頭錯應者寔爲臣準備  
語也是豈可以擬議於此職也哉嗚呼舉賢授官上之所以使  
下之道也量才就職臣之所以事君之義也臣雖無似粗聞此



個道理半世立朝雖不能出一言做一事以裨我 聖上清明之治而今於年紀衰邁之境又敢貪戀華貫翱翔名塗甘自歸於累 聖簡而壞本分之科哉例勘曾未數日 恩除又復如前滿心憂懼如添一病左右揣量有萬分必遞之義無一毫可強之勢茲敢略入文字冒陳衷懇伏乞 聖慈天地父母特軫人器之不稱曲諒辭選之非飭亟命鑄削勿復檢擬以重公器以遂微諒千萬幸甚臣無任祈懇屏營之至謹昧死以聞

再辭吏曹叅議疏

伏以臣年紀衰邁疾病沉痾冗散之職猶懼不堪銓選之任尤非可擬前後恩除輒不敢爲冒進之計者誠非獲己也大政之



日又犯違通宜被譴何而聖度至寬例勘不加臣於是感激  
蹴踏雖不得不一肅恩命而第臣情病之外又有所難安者  
夫銓衡重任也通塞大政也挽近以來官隨人輕人之見待已  
之自處雖不如古而若其職名不可不顧也格例不可不存也  
凡所通擬無論大小爛熳相議取捨必慎僚堂之有未同席者  
則輒折簡而通議者即古規也日前臺通數望在臣除職之後  
而不令相知臣固知咫尺威顏之下忿卒注擬之際無怪乎遺  
忘格式而流來銓法緣臣壞了寧不愧惡其在自引之道不容  
以事過而但已茲敢略入文字仰瀆崇嚴伏乞聖慈俯垂諒  
察亟命鑄削臣職名以安賤分不勝幸甚云々



議

咸平縣漁鹽船稅議

本邑濱海地面不過數十餘里漁鹽稅額但爲八十餘兩今此廟堂所詢漁鹽利害以本邑物情有難周知而其間亦不無多小弊端一如說者之云々故略陳如左至於專屬均廳出付道臣兩欸利害則詢於海民叅以愚見別爲附陳焉蓋自設均廳以來毋論漁鹽船一番納稅之後元無各宮房各營邑侵徵之事則宜其海利日繁稅額歲增而挽近以來漸不如前誠爲訝惑之端矣今以本邑言之自均廳一定稅案之後雖有每式年查括改案之規而爲守令者既無贏利之入又無專管之責其



所查括全不以誠但避上司之責罔念海民之怨雖有新現之可報者而慮其增稅之爲弊不爲加報雖有物力之可助者而謂以自己之無利不爲助成且自近年以來雖有頃報而均廳一不聽施故破船廢坊並爲白徵本邑亦有一二塩盆之破棄者而既不蒙頃則不免加徵於見在之塩盆以充上納之數塩稅如此則漁稅可知一邑如此則它邑可知種々弊端果如說者之言則今不必縷々疊床而若究其爲弊之源則實有由焉大抵數十年以來魚產漸縮所捉甚少魚產既縮則所謂漁箭漁簾漁網漁船不得不隨而漸縮矣我國青魚最爲地產聞於海民之言則本邑立箭設簾之處皆爲青魚而數年以來不見



一鱗云又聞於數百年前我東青魚移產遼海遼人不知稱以  
新魚云蓋其地利之變遷物產之往來理或宜然我國多產之  
魚至於絕種之境則所謂數文錢一級魚之故事誠不可復見  
矣以此論之則稅額之漸縮不在於白徵又不在於隱漏專在  
於魚產之漸縮矣今雖出付道臣魚產既如是漸縮則稅額亦  
何以無減乎若出付道臣則竊恐爲弊之端反有甚於均廳專  
管之時也何以言之今雖以中下摠數出付道臣而年年比摠  
既不可減則不得不逐歲查括而查括之任不過別擇裨校使  
之逐庫摘奸而此輩異於士流惟務稱上之意罔念益下之道  
乘威侵虐無所不至於是乎以小爲大以短爲長者亦當有之



若果如此則民情大駭海戶騷然額數雖增於一時而陳廢必多於它日矣裨校既如是爲廢則又不過付諸該邑而營門之操縱進退一如年分勘災之規則爲守令者廉者則嫌於贏利之自占必務多報貪者則又欲脂膏之自潤俾無遺利其所侵虐一如裨校之爲矣其或反是者不畏上司之論責惟思海民之利益專務減報不爲增數則稅額之漸縮顧何異於均應遙領之時耶大抵均廳之設科條既嚴節目且詳遵而行之今已三十餘年法久弊生自昔已然今無別般利益而輕爲變更則恐不但生一弊而已且觀於海民之情則無它農業專靠漁利者雖有增稅白徵之弊果是捉魚蒙利之處則或箭或簾依前



自如其在它邑漁利最多處則亦豈無隱漏避稅之類乎以此言之則不若依前節目專屬均廳而每式年使各道々臣別擇道內剛明守令爲差使員沿海摘奸一從實數無務比摠則必將有失此得彼利東補西之益矣蓋其查括之任專委差員則旣無贏利自占之嫌又無海民私護之心破造陳起庶幾從實然則雖不出付道臣而各道自有管攝之方名謂專屬均廳而海民亦有赴愬之路矣其出付便否來頭利害大略如斯矯救之道亦不外是至於節目則旣以出付爲不便故不敢論列愚見如是伏惟裁擇焉

策

王若曰書曰知人則哲能官人夫官人者必先知人知人之於人主大矣哉夫以帝堯之聖明何難乎知人惟帝其難之者何也夢見而傳說作相筮從而渭叟爲師知人之術亦資於夢筮歟三代以後知人善任最稱漢武而如卜式之拔於菟牧日磾之舉於降虜果何所取歟天人策首擢董子社稷臣獨稱汲生固不可謂不知而或黜之江都或斥於淮陽終不能以其官之則知人之中抑獨有不知者存歟洛陽南宮自稱三傑之能用貞觀便殿指論諸臣之孰賢其所評品亦皆允當而無差歟天子以爲國器安國之見知也何居疾風知其勁草蕭瑀之受知也何事



王猛之才世所不知而苻堅獨知之盧杞之奸人皆知之而唐帝獨不知者何歟藝祖委書生以天下而竟負金櫃之盟孝皇倚魏公以長城而未免符離之敗此謂知歟不知歟大抵知臣莫如君古語有之比於堂上人能卞堂下人長短賢愚庶乎其知之不難而抑有不盡然者今復良玉委泥色澤不變君子在朝德操自異其心正身修表裏一致者雖暗中摸索可知爲君子而第人之心與貌不相符者亦多矣聽其言則非不正直而察其心則回互觀其外則非不公平而顧其內則奸詭色柔而志勁者有之質鈍而行敏者有之其態萬狀若此者何以辨別於疑似之

中斟量於權衡之際知之深而任之當乎是以自古帝王孰不欲任賢退邪任職圖理而或不免薰蕕同器朱紫亂色甚至讎嫉忠良酷信奸佞躬駕而隨覆轍者往々有之可勝歎哉予自卽祚以來思所以得賢共理而蓼尤乏藥寵之儲畏臬失大小之宜欲求勁直而孰是朝陽之鳳欲籍威望而孰是在山之虎紀綱不可不立而贊予振刷之政者何人獄訟不可不慎而贊予平允之治者何人外而方伯守宰內而卿士庶僚或在倚毗而有不勝任者或在試可而有能舉職者知人之道終不得其方而然歟汲良材於寒畯而授官則拘於地閭舉殊績於蔭路而列位則



遜於科目良由余知之者不能盡其蘊任之者不能得其  
方使有才者不盡立於朝在朝者未必盡其才也何以則  
品藻極精激揚有術俾先聖王知人官人之道復見於今  
歟子大夫必有平日講磨於中者其各悉著于篇予將親  
覽焉

臣對臣嘗以爲知人非難也所以自知者甚難也苟在我而無  
自知之明則雖欲知人而其於無鏡以照之何哉烏虜誰以古  
人磨鏡之說聞於我 殿下者乎夫鏡之爲物也本自光明洞  
徹纖微畢照凡物之妍者燭者嫵者惡者莫能逃其形焉然而  
或有纖塵之棲於中微垢之蝕於面者則美者不見其美矣惡

者不見其惡矣烏虜心者一身之鏡也自古人君蓋莫不操此  
心以爲觀人之欄柄明此心以爲照人之藻鑑則凡於觀人用  
人之際宜其罔失乎錙銖不爽乎毫髮而然而以其賢者而或  
以爲不賢者有之矣以其奸者而或以爲非奸者有之矣自古  
及今一轍相尋此其故何哉噫自古人君必以知人爲先而不  
以自知爲先理有所不格則於人之賢愚無以辨其真矣心有  
所不明則於人之邪正無以察其情矣是故古之聖人必也明  
理而正其心格物而致其知如鑑之磨而益爛如水之止而益  
清則工兜難進於堯朝而魍魎莫逃於禹鼎矣古語曰知人則  
明自知則暗臣則以爲非知言也曷嘗有暗於知己而能明於



知人者乎曷嘗有明於自知而反暗於他知者乎雖以聖問  
中殷宗之事言之一念思道三年積誠蓋不過以一箇虛明之  
心感得來傅巖一賢者而先儒亦有以懸鏡照物譬之者矣昔  
唐臣張九齡採取前代以來一興一亡可以作鑑者爲千秋金  
鑑錄以備明皇常目之監者其意蓋以歷代興亡之跡爲明皇  
磨鏡之方以爲辨別賢邪之資則明皇之知人也宜不眩於九  
齡林甫直倭之間而卒使賢邪倒置四海板蕩則豈非明皇之  
暗於自知者乎洪惟我國家聖神相繼明良相得知人之明  
莫如我祖宗朝矣得人之美亦莫如我祖宗朝矣竊伏見  
我殿下哀集祖宗以來嘉言善政成國朝寶鑑四十餘卷



朝夕焉拱手而讀之夙宵焉寓目而體之凡可以明理而正心  
以之爲知人之鑑者固莫如乎一部祖鑑而然猶自視歆然  
迺進臣等於庭十行諄々策以知人之方惟恐則哲之明或有  
所遺照於廷紳得人之美或有所未及於列朝臣雖不佞竊感  
斯會敢不以古人磨鏡之方仰陳焉臣伏讀聖策自書曰知  
人止不知歟臣雙擎百拜丹衷自激臣竊謂官人之方知人爲  
先蓋列官分職待賢弘功而得賢之方惟在賢否之能知天工  
人代非賢罔乂而官人之道惟在能否之必知肆古聖王之官  
人也必懋乎賢邪之辨明必思乎淑慝之鑑別分以衆職而先  
察店楔之所宜列于庶位而先輸茅茹之彙征知之明而後可



以擇之精擇之精而後可以任之當也若是乎官人者之不可不知人也嗚呼從古以來明君哲辟蓋莫不以知人爲務而顧瞻有位賢不肖混矣考諸史牒邪與正雜矣此其故何哉直以一念之間未能祛其私邪之弊而好惡或循於一己取捨或眩於私意故也然則莫若去私而已伏願  殿下勉々焉請沿聖問而條陳焉噫知人之明自昔爲難方命之繇不免試可則惟帝其難不亦宜乎噫恭默積誠乃致帝賚之祥熊羆吐兆爰得適周之弼則風雲異徵明良盛會尙矣何論噫三代以後知人善任者臣亦許武皇之世蓋或以牧羊而至於九卿蓋或以勞面而至於托幼則宜若有則哲之明而天人之學社稷之臣



終不免棄斥而終身則臣不欲爲 殿下覲縷焉噫南宮樽酒  
自許三傑之能用則高皇豁達之度可謂有知人之明矣貞觀  
筵對歷論諸臣之品藻則文皇鑑別之能亦可謂知人之明而  
然飛鳥之諭亦不知遂良之賢矣曷足貴乎噫安國々器之評  
蓋許其焚獄之對也蕭瑀勁草之獎蓋記其武德中言也弊衣  
捫虱獨爲苻堅之用藍面懷姦反蠱德宗之聰則其或明或暗  
臣何暇費論噫趙中令之委任旣專而再誤之說不免負宋祖  
之知張魏公之倚伏何如而符離之敗不免孤孝宗之托則知  
人之難蓋如是矣噫評品徃跡都屬已然之轍而論其得失則  
皆源於一心之理也嗚呼可不戒哉臣伏讀 聖策自大抵知



臣止復見於今歟臣雙擎百拜丹衷益激嗚呼知臣莫如君固有古人之語能卞堂下人亦有先哲之論則凡人之長短也賢愚也鑑別不難而抑又有不然者至若良玉委泥而色不變君子處世而德不渝者則其表裏如一摸索可知而其他貌同而心異跡是而行非者則態狀有萬不可殫記蓋有言正直而心回互者外公平而內奸詭者色柔而志勁者有之質鈍而行敏者有之若此者類實無以辨之明而任之當者由是之故自古聖帝明王孰不欲得人善任而薰蕕不免於同器朱紫或至於亂色乃至於讎視忠良酷信佞邪滔々後世敗亡相繼烏虜可勝歎哉恭惟我主上殿下以聰明睿智之姿膺祖宗付



畀之托憂勤七載宵旰一念專在於得人而任職求士而備官  
厦氈之所勤咨者無非渴賢之念朝廷之所需待者無非得人  
之意則宜其羣材丕興衆職咸稱而環顧今日大有所不然者  
蓼朮無儲於藥籠椳臬或欠於成室鳴鳳無聞於朝陽猛虎不  
聞於衛霍紀綱之振刷者無人訟獄之平允者乏人外焉而方  
伯守令內焉而卿士庶僚或以爲可任而僨職者有之或以爲  
姑試而舉職者有之知人之方若是其難矣至若人材或出於  
寒門而拘於地閥而不用殊績或責於蔭路而視諸科目則或  
遜惟茲數者之弊有不暇枚舉者若以爲我 殿下知人之明  
有不能盡其蘊則 殿下之明睿所照無幽之不燭若以爲我



殿下任職之方或不得其當則殿下之器使群工其才之各當矣是何人才之不盡立也抑何人才之不盡用也如此乎臣誠左右顧而莫知所以仰對也雖然臣操觚入庭仰瞻明問亦有所耿耿于中者今當得言之會敢不略陳焉臣聞心者一身之主也萬事之本也清明之地物欲昏之或以貨財或以聲色凡可以爲心之累而蔽心之明者卽所謂私也一念之間私或有之而不能察焉則是非而失其是非之正愛惡而失其愛惡之正心雖在身而如無星之秤無寸之尺不可以爲稱量權度之用矣其在於人也則其言也正而有以害吾之私則必以爲不賢而斥之矣其言也諛而有以便吾之私也則必以爲

賢而親之矣私之所在觸處皆然終至於倒賢愚而混涇渭焉  
然則知人之道盖非有別般妙法必也公吾心而愛惡焉以正  
明吾心而取舍焉是審而已矣此朱夫子以六急務陳於孝宗  
而必以一念之私逐段申々焉者也誠願我 殿下毋患乎人  
才之難知而必思夫私心之克祛勿憂乎賢邪之未分而必軫  
乎此心之克正使靈臺方寸之地虛明洞徹無有一毫之累無  
有一念之私則將見鑑別極精於觀人之際激揚有術於官人  
之際古聖王則哲之明無曠之美庶幾不日而可觀矣臣伏讀  
聖策自子大夫止親覽焉臣雙擎再拜丹衷益激臣旣以正  
心去私之工爲今日知人之策而若欲其心如何而正也私如



何而去也則不過曰敬而已程子曰敬勝百邪又曰敬者一心  
之主宰也然則敬之一字不但爲聖學工夫也其於知人官人  
之方亦爲其根柢也伏願 殿下懋哉々々臣謹對

疎翁遺稿卷之二















